

დამტკიცებულია
სენაკის რაიონული სასამართლოს თავმჯდომარის
2024 წლის 20 თებერვლის № 48 ბრძანებით

პერსონალურ მონაცემთა დამუშავებასთან დაკავშირებული პროცესების შესახებ
სენაკის რაიონულ (მათ შორის აბაშისა და მარტვილის მაგისტრატი)
სასამართლოს დებულების დამტკიცების შესახებ

სარჩევი

თავი I	4
ზოგადი დებულებები	4
მუხლი 1. მიზანი	4
მუხლი 2. მოქმედების სფერო	4
თავი II	5
მონაცემთა დამუშავების კანონიერება	5
მუხლი 3. მონაცემთა დამუშავების პრინციპები	5
მუხლი 4. მონაცემთა დამუშავების საფუძვლები	6
მუხლი 5. განსაკუთრებული კატეგორიის მონაცემთა დამუშავება	6
თავი III	7
მონაცემთა სუბიექტის უფლებები	7
მუხლი 6. მონაცემთა სუბიექტის უფლებები	7
მუხლი 7. მონაცემთა სუბიექტის უფლებების შეზღუდვა	7
მუხლი 8. გასაჩივრების უფლება	8
თავი IV	8
სენაკის რაიონული (მათ შორის აბაშისა და მარტვილის მაგისტრატი)	8
სასამართლოს ვალდებულებები	8
მუხლი 9. მონაცემთა დამუშავებასთან დაკავშირებული ზოგადი ინფორმაციის აღრიცხვა და პერსონალურ მონაცემთა დაცვის სამსახურისთვის შეტყობინება	8
მუხლი 10. მონაცემთა სუბიექტის ინფორმირება მონაცემთა უშუალოდ მისგან შეგროვების შემთხვევაში	9
მუხლი 11. მონაცემთა სუბიექტის ინფორმირება თუ მონაცემების შეგროვება უშუალოდ მისგან არ ხდება	9
მუხლი 12. მონაცემთა უსაფრთხოება	10
მუხლი 13. ინციდენტის შესახებ პერსონალურ მონაცემთა დაცვის სამსახურისთვის შეტყობინების ვალდებულება	10
მუხლი 14. ინციდენტის შესახებ მონაცემთა სუბიექტის ინფორმირების ვალდებულება	11
მუხლი 15. მონაცემთა დაცვაზე ზეგავლენის შეფასება	12
მუხლი 16. პერსონალურ მონაცემთა დაცვის ოფიცერი	12
თავი V	13
პერსონალურ მონაცემთა დამუშავებასთან დაკავშირებული პროცესები შესაბამისი სტრუქტურული ერთეულების მიხედვით	13
მუხლი 17. ვიდეომონიტორინგის განხორციელება	13
მუხლი 18. აუდიო მონიტორინგი	14
მუხლი 19. პერსონალურ მონაცემთა დამუშავება შენობაში (სამუშაო ადგილზე) შესვლისა და გასვლის აღრიცხვის მიზნით	16

მუხლი 20. მანდატურის სამსახური	16
მუხლი 21. პერსონალურ მონაცემთა დამუშავება საჯარო ინფორმაციის გაცემისას	17
მუხლი 22. სასამართლო კანცელარია (სტატისტიკის წარმოება)	18
მუხლი 23. სამეურნეო მიმართულების კოორდინაცია	21
მუხლი 24. ადამიანური რესურსების მართვისა და სამართლებრივი უზრუნველყოფა	21
მუხლი 25. სენაკის რაიონული (მათ შორის აბაშისა და მარტვილის მაგისტრატი) სასამართლოში შექმნილი თემატური კომისიები და სამუშაო ჯგუფები	
მუხლი 26. სენაკის რაიონული სასამართლოს ვებგვერდი	25
თავი VI	25
დასკვნითი დებულებები	25
მუხლი 27. დებულების ამოქმედება	25
მუხლი 28. „პერსონალურ მონაცემთა დაცვის შესახებ“ საქართველოს კანონით გათვალისწინებული გამონაკლისები	25
მუხლი 29. „პერსონალურ მონაცემთა დაცვის შესახებ“ საქართველოს კანონით გათვალისწინებული მოთხოვნები, რომლებიც არ ვრცელდება სენაკის რაიონული (მათ შორის აბაშისა და მარტვილის) სასამართლოს მიმართ	26

სენაკის რაიონულ (მათ შორის აბაშისა და მარტვილის მაგისტრატ) სასამართლოს დებულება პერსონალურ მონაცემთა დამუშავებასთან დაკავშირებული პროცესების შესახებ

თავი I

ზოგადი დებულებები

მუხლი 1. მიზანი

1. ამ დებულების მიზანია სენაკის რაიონულ (მათ შორის აბაშისა და მარტვილის მაგისტრატ) სასამართლოში პერსონალურ მონაცემთა დამუშავებისას ადამიანის ძირითადი უფლებებისა და თავისუფლებების, მათ შორის, პირადი და ოჯახური ცხოვრების, პირადი სივრცისა და კომუნიკაციის ხელშეუხებლობის უფლებების, დაცვა.
2. ეს დებულება მიღებულია „პერსონალურ მონაცემთა დაცვის შესახებ“ საქართველოს კანონით დადგენილი ვალდებულებების შესასრულებლად პერსონალურ მონაცემთა დაცვის საკანონმდებლო გარანტიების განმტკიცებისა და ამ უფლების პატივისცემაზე ორიენტირებული ორგანიზაციული კულტურის ხელშეწყობის მიზნით.
3. ამ დებულებაში გამოყენებული შესაბამისი ტერმინები განიმარტება „პერსონალურ მონაცემთა დაცვის შესახებ“ საქართველოს კანონის მე-3 მუხლის მიხედვით.

მუხლი 2. მოქმედების სფერო

1. ამ დებულების მოქმედება ვრცელდება სასამართლოში მონაცემთა ავტომატური საშუალებებით დამუშავებასა და ნახევრად ავტომატური საშუალებებით დამუშავებაზე, იმ მონაცემთა არაავტომატური საშუალებებით დამუშავებაზე, რომლებიც ფაილური სისტემის ნაწილია ან ფაილურ სისტემაში შესატანად მუშავდება.
2. სასამართლოში მონაცემთა დამუშავებაზე „პერსონალურ მონაცემთა დაცვის შესახებ“ საქართველოს კანონის გავრცელება წესრიგდება ამ დებულებით დადგენილი წესის შესაბამისად.
3. სასამართლოს დამოუკიდებლობის, მიუკერძოებლობისა და მართლმსაჯულების ჯეროვანი ადმინისტრირების უზრუნველყოფისა და განმტკიცების მიზნით, „პერსონალურ მონაცემთა დაცვის შესახებ“ საქართველოს კანონი არ მოქმედებს სასამართლოს საქმიანობაზე, თუ პირის პერსონალური მონაცემები სასამართლოში სამართალწარმოების მიზნით მონაცემთა დამუშავების ფარგლებში მუშავდება.
4. მართლმსაჯულების განხორციელებასთან დაკავშირებული მიზნების, ფუნქციებისა და ამოცანების შესრულების, მათ შორის, სამოქალაქო, ადმინისტრაციულ და სისხლის სამართალწარმოებათა მეშვეობით, სასამართლო პრაქტიკის შესწავლისა და განზოგადების, ადამიანის უფლებების სამართლის კვლევაზე ორიენტირებული საქმიანობის, სასამართლო სტატისტიკის ანალიზისა და სხვა ანალიტიკური, აგრეთვე, სასამართლოს სხვა ცალკეული საქმიანობის განხორციელების მიმართ მოქმედებს ამ დებულების მე-2 მუხლის მე-3 პუნქტი. სასამართლოს სხვა ცალკეულ საქმიანობაში მოიაზრება ღონისძიებების, ორგანიზაციულ-ტექნიკური ზომებისა და საქმიანობათა კატეგორიების ისეთი ერთობლიობა, რომელიც უშუალოდ არ მიემართება სამართალწარმოების განხორციელებას, თუმცა, თავისთავად გამომდინარეობს მართლმსაჯულების განხორციელების მიზნებისა და ზოგადი პრინციპებისგან.

მონაცემთა დამუშავების კანონიერება

მუხლი 3. მონაცემთა დამუშავების პრინციპები

1. სენაკის რაიონული (მათ შორის აბაშისა და მარტვილის მაგისტრატები) სასამართლო საკუთარ საქმიანობას წარმართავს მონაცემთა დაცვის სფეროში საერთაშორისოდ აღიარებული და ეროვნული კანონმდებლობით განმტკიცებული პრინციპების საფუძველზე, რომლებიც ინტეგრირებულია ადმინისტრაციული ან/და მმართველობითი ფუნქციების განხორციელების პროცესებში.
2. სენაკის რაიონულ (მათ შორის აბაშისა და მარტვილის მაგისტრატები) სასამართლოში პირის პერსონალური მონაცემები მუშავდება კანონიერად, სამართლიანად, გამჭვირვალედ, მონაცემთა სუბიექტის ღირსების შეულახავად.
3. სენაკის რაიონულ (მათ შორის აბაშისა და მარტვილის მაგისტრატები) სასამართლოში მონაცემთა დამუშავებასთან დაკავშირებული ნებისმიერი მოქმედება ხორციელდება მხოლოდ კონკრეტული, მკაფიოდ განსაზღვრული და ლეგიტიმური მიზნებისთვის. დაუშვებელია მონაცემთა შემდგომი დამუშავება სხვა, მონაცემთა დამუშავების თავდაპირველ მიზანთან შეუთავსებელი მიზნით. მონაცემთა შემდგომი დამუშავება მონაცემთა დამუშავების თავდაპირველ მიზანთან შეუთავსებლად არ მიიჩნევა, მაშინ როდესაც:
 - ა) სენაკის რაიონული (მათ შორის აბაშისა და მარტვილის მაგისტრატები) სასამართლოს მიერ მონაცემები მუშავდება მართლმსაჯულების განხორციელების მიზნებისთვის და ასეთი დამუშავება გათვალისწინებულია კანონით ან კანონითა და მის საფუძველზე გამოცემული კანონქვემდებარე ნორმატიული აქტით.
 - ბ) სენაკის რაიონული (მათ შორის აბაშისა და მარტვილის მაგისტრატები) სასამართლო მონაცემებს ამუშავებს საჯარო ინტერესების შესაბამისად არქივირების, სამეცნიერო ან ისტორიული კვლევის ან სტატისტიკური მიზნებისთვის.
4. ამ მუხლის მე-3 პუნქტის „ა“ და „ბ“ ქვეპუნქტების მიზნებისთვის, „მართლმსაჯულების განხორციელებისა და საჯარო ინტერესების შესაბამის მიზნებში“ იგულისხმება ისეთი საქმიანობა, რომელიც სასამართლოში სამართალწარმოების მიზნით მონაცემთა დამუშავების ფარგლებს არ მიეკუთვნება და უშუალოდ სასამართლოს ადმინისტრაციულ ან/და მმართველობით ფუნქციებში შედის, მაგრამ, თავისი არსით, მიემართება საერთო სასამართლოების სისტემასა და ორგანიზაციულ მოწყობას. მონაცემთა სუბიექტის უფლებების დასაცავად მიღებული უსაფრთხოების სათანადო ტექნიკური და ორგანიზაციული ზომების გათვალისწინებით, სასამართლო იტოვებს ამ კატეგორიის მონაცემთა ხანგრძლივად შენახვის უფლებამოსილებას.
5. სენაკის რაიონულ (მათ შორის აბაშისა და მარტვილის მაგისტრატები) სასამართლოში პირის პერსონალური მონაცემები მუშავდება მხოლოდ იმ მოცულობით, რომელიც აუცილებელია შესაბამისი ლეგიტიმური მიზნის მისაღწევად. პერსონალურ მონაცემთა მოცულობასა და მისაღწევ მიზნებს შორის თანაზომიერება დაცულია.
6. სენაკის რაიონულ (მათ შორის აბაშისა და მარტვილის მაგისტრატები) სასამართლოში დამუშავებას დაქვემდებარებული ყველა მონაცემი ნამდვილი და ზუსტია. შესაბამისი საჭიროების ან იმ შემთხვევაში თუ პირის შესახებ სასამართლოში დაცული მონაცემები მცდარი, არაზუსტი ან/და არასრულია, მონაცემთა დამუშავების მიზნების გათვალისწინებით, ისინი შესაძლებელია დაექვემდებაროს გასწორებას, წაშლას ან/და განადგურებას გაუმართლებელი დაყოვნების გარეშე. მონაცემთა სუბიექტის უფლება მონაცემთა გასწორების, განახლების ან/და შევსების შესახებ დაცულია.
7. სენაკის რაიონულ (მათ შორის აბაშისა და მარტვილის მაგისტრატები) სასამართლოში პირის პერსონალური მონაცემები შენახულია მხოლოდ იმ ვადით, რომელიც აუცილებელია მონაცემთა დამუშავების შესაბამისი ლეგიტიმური მიზნის მისაღწევად. იმ მიზნის მიღწევის

შემდეგ, რომლისთვისაც მუშავდება მონაცემები, სასამართლო უზრუნველყოფს მათ წაშლას, განადგურებას ან შენახვას დეპერსონალიზებული ფორმით.

8. სენაკის რაიონულ (მათ შორის აბაშისა და მარტვილის მაგისტრატ) სასამართლოში მონაცემთა უსაფრთხოების დაცვის მიზნით დანერგილია ისეთი ტექნიკური და ორგანიზაციული ზომები, რომლებიც სათანადოდ უზრუნველყოფს მონაცემთა დაცვას, მათ შორის, უნებართვო ან უკანონო დამუშავებისგან, შემთხვევითი დაკარგვისგან, განადგურებისგან ან/და დაზიანებისგან. პერსონალურ მონაცემებზე წვდომის საჭიროება განისაზღვრება მხოლოდ დაკისრებული ფუნქციების და საქმიანობის ფარგლებში.
9. პერსონალურ მონაცემთა დამუშავების სამართლებრივი საფუძვლები, მიზნები, პროპორციულობა, ნამდვილობა, შენახვის ვადები და შესაბამისი ორგანიზაციულ-ტექნიკური ზომები, შესაძლებელია განსხვავდებოდეს სტრუქტურული ერთეულის კომპეტენციას მიკუთვნებული საქმიანობის საგნობრივი სფეროების მიხედვით და ისინი, საჭიროების შემთხვევაში, განისაზღვრება ამ დებულებით.

მუხლი 4. მონაცემთა დამუშავების საფუძვლები

1. სენაკის რაიონულ (მათ შორის აბაშისა და მარტვილის მაგისტრატ) სასამართლოში პირის პერსონალური მონაცემები მუშავდება ერთ-ერთი ან რამდენიმე შესაბამისი საკანონმდებლო საფუძვლის არსებობისას, თუ:
 - ა) მონაცემთა სუბიექტმა განაცხადა თანხმობა მის შესახებ მონაცემთა ერთი ან რამდენიმე კონკრეტული მიზნით დამუშავებაზე;
 - ბ) დამუშავება აუცილებელია მონაცემთა სუბიექტთან დადებული გარიგებით ნაკისრი ვალდებულების შესასრულებლად ან მონაცემთა სუბიექტის მოთხოვნით გარიგების დასადებად;
 - გ) დამუშავება გათვალისწინებულია კანონით;
 - დ) დამუშავება საჭიროა დამუშავებისთვის პასუხისმგებელი პირის მიერ საქართველოს კანონმდებლობით მისთვის დაკისრებული მოვალეობების შესასრულებლად;
 - ე) კანონის თანახმად, მონაცემი საჯაროდ ხელმისაწვდომია ან მონაცემთა სუბიექტმა იგი საჯაროდ ხელმისაწვდომი გახადა;
 - ვ) დამუშავება აუცილებელია მნიშვნელოვანი საჯარო ინტერესის დასაცავად;
 - ზ) დამუშავება აუცილებელია საჯარო ინტერესის სფეროსთვის მიკუთვნებული ამოცანების შესასრულებლად, მათ შორის, მართლმსაჯულების განსახორციელების მიზნებისთვის;
 - თ) მონაცემთა დამუშავება აუცილებელია დამუშავებისთვის პასუხისმგებელი პირის ან მესამე პირის მნიშვნელოვანი ლეგიტიმური ინტერესების დასაცავად, გარდა იმ შემთხვევისა, თუ არსებობს მონაცემთა სუბიექტის (მათ შორის, არასრულწლოვანის) უფლებების დაცვის აღმატებული ინტერესი.
 - ი) მონაცემთა დამუშავება აუცილებელია მონაცემთა სუბიექტის განცხადების განსახილველად.

მუხლი 5. განსაკუთრებული კატეგორიის მონაცემთა დამუშავება

1. სენაკის რაიონულ (მათ შორის აბაშისა და მარტვილის მაგისტრატ) სასამართლოში უზრუნველყოფილია მონაცემთა სუბიექტის უფლებებისა და ინტერესების დაცვის გარანტიები და განსაკუთრებული კატეგორიის მონაცემები მუშავდება მინიმუმ ერთ-ერთი შემდეგი საფუძვლის არსებობისას:
 - ა) მონაცემთა სუბიექტმა განაცხადა წერილობითი თანხმობა ერთი ან რამდენიმე კონკრეტული მიზნით განსაკუთრებული კატეგორიის მონაცემთა დამუშავებაზე;
 - ბ) განსაკუთრებული კატეგორიის მონაცემთა დამუშავება პირდაპირ და სპეციალურად რეგულირდება კანონით და მათი დამუშავება აუცილებელი და პროპორციული ზომაა დემოკრატიულ საზოგადოებაში;

გ) თუ ასეთი დამუშავება აუცილებელია მართლმსაჯულების განხორციელების მიზნებისთვის, რომელიც განისაზღვრება ამ დებულების მე-3 მუხლის მე-4 პუნქტით დადგენილი წესის შესაბამისად;

დ) თუ ასეთი დამუშავება აუცილებელია “პერსონალურ მონაცემთა დაცვის შესახებ” საქართველოს კანონის მე-6 მუხლით გათვალისწინებული სხვა მნიშვნელოვანი საჯარო ინტერესის დასაცავად.

თავი III

მონაცემთა სუბიექტის უფლებები

მუხლი 6. მონაცემთა სუბიექტის უფლებები

1. მონაცემთა სუბიექტს უფლება აქვს, მიიღოს მონაცემთა დამუშავების შესახებ ინფორმაცია „პერსონალურ მონაცემთა დაცვის შესახებ“ საქართველოს კანონის მე-13 მუხლის შესაბამისად.
2. მონაცემთა სუბიექტს უფლება აქვს, გაეცნოს მის შესახებ არსებულ პერსონალურ მონაცემებს და მიიღოს ამ მონაცემების ასლები „პერსონალურ მონაცემთა დაცვის შესახებ“ საქართველოს კანონის მე-14 მუხლის შესაბამისად.
3. მონაცემთა სუბიექტს უფლება აქვს, მოითხოვოს მის შესახებ არსებული პერსონალურ მონაცემების გასწორება, განახლება და შეცვლა „პერსონალურ მონაცემთა დაცვის შესახებ“ საქართველოს კანონის მე-15 მუხლის შესაბამისად.
4. მონაცემთა სუბიექტს უფლება აქვს, მოითხოვოს მის შესახებ მონაცემთა დამუშავების შეწყვეტა, წაშლა ან განადგურება „პერსონალურ მონაცემთა დაცვის შესახებ“ საქართველოს კანონის მე-16 მუხლის შესაბამისად.
5. მონაცემთა სუბიექტს უფლება აქვს, მოითხოვოს მონაცემთა დაბლოკვა „პერსონალურ მონაცემთა დაცვის შესახებ“ საქართველოს კანონის მე-17 მუხლის შესაბამისად.
6. მონაცემთა სუბიექტს უფლება აქვს, მოითხოვოს მონაცემთა გადატანა „პერსონალურ მონაცემთა დაცვის შესახებ“ საქართველოს კანონის მე-18 მუხლის შესაბამისად.
7. მონაცემთა სუბიექტს უფლება აქვს ნებისმიერ დროს, ყოველგვარი განმარტების ან დასაბუთების გარეშე გამოიხმოს მის მიერ გაცემული თანხმობა „პერსონალურ მონაცემთა დაცვის შესახებ“ საქართველოს კანონის მე-20 მუხლის შესაბამისად.
8. ამ მუხლის მე-7 პუნქტით გათვალისწინებულ შემთხვევაში, სენაკის რაიონული (მათ შორის აბაშისა და მარტვილის მაგისტრატი) სასამართლოს ვალდებულებები, მონაცემთა სუბიექტისგან თანხმობის მიღების და მის მიერ თანხმობის გამოხმობის შემთხვევებში, განისაზღვრება „პერსონალურ მონაცემთა დაცვის შესახებ“ საქართველოს კანონის 32-ე მუხლის შესაბამისად.

მუხლი 7. მონაცემთა სუბიექტის უფლებების შეზღუდვა

1. მონაცემთა სუბიექტის უფლებების შეზღუდვასთან დაკავშირებული საკითხები განისაზღვრება „პერსონალურ მონაცემთა დაცვის შესახებ“ საქართველოს კანონის 21-ე მუხლით დადგენილი წესით.
2. მონაცემთა სუბიექტის ამ დებულების მე-6, მე-10 და მე-11 მუხლებით გათვალისწინებული უფლებები შეიძლება შეიზღუდოს, თუ ეს პირდაპირ არის გათვალისწინებული საქართველოს კანონმდებლობით, ამით არ ირღვევა ადამიანის ძირითადი უფლებები და თავისუფლებები, ეს არის აუცილებელი და პროპორციული ზომა დემოკრატიულ საზოგადოებაში და ამ უფლებების განხორციელებამ შეიძლება საფრთხე შეუქმნას:
 - ა) სახელმწიფო უსაფრთხოების, ინფორმაციული უსაფრთხოებისა და კიბერუსაფრთხოების ან/და თავდაცვის ინტერესებს;
 - ბ) საზოგადოებრივი უსაფრთხოების ინტერესებს;
 - გ) დანაშაულის თავიდან აცილებას, დანაშაულის გამოძიებას, სისხლისსამართლებრივ დევნას, მართლმსაჯულების განხორციელებას, პატიმრობისა და თავისუფლების აღკვეთის

აღსრულებას, არასაკაპიტმორო სასჯელთა აღსრულებას და პრობაციას, ოპერატიულ-სამძებრო საქმიანობას;

დ) ქვეყნისთვის მნიშვნელოვან ფინანსურ ან ეკონომიკურ (მათ შორის, მონეტარულ, საბიუჯეტო და საგადასახადო), საზოგადოებრივი ჯანმრთელობისა და სოციალური დაცვის საკითხებთან დაკავშირებულ ინტერესებს;

ე) მონაცემთა სუბიექტის მიერ პროფესიული, მათ შორის, რეგულირებადი პროფესიის, ეთიკის ნორმების დარღვევის გამოვლენას და მისთვის პასუხისმგებლობის დაკისრებას;

ვ) ამ მუხლის მეორე პუნქტის „ა“, „ბ“, „გ“, „დ“, „ე“, „ზ“ ან „ი“ ქვეპუნქტით განსაზღვრულ სფეროებში მარეგულირებელი ან/და ზედამხედველობის განმახორციელებელი ორგანოების ფუნქციებისა და უფლებამოსილებების განხორციელებას;

ზ) მონაცემთა სუბიექტის ან/და სხვა პირების უფლებებსა და თავისუფლებებს, მათ შორის, გამოხატვის თავისუფლებას;

თ) სახელმწიფო, კომერციული, პროფესიული და კანონით გათვალისწინებული სხვა სახის საიდუმლოებების დაცვას;

ი) სამართლებრივი მოთხოვნის ან შესაგებლის დასაბუთებას.

3. ამ მუხლის მეორე პუნქტით გათვალისწინებული ზომა შეიძლება გამოყენებულ იქნეს მხოლოდ იმ მოცულობით, რომელიც აუცილებელია შეზღუდვის მიზნის მისაღწევად.
4. ამ მუხლის მეორე პუნქტით გათვალისწინებული საფუძვლების არსებობისას მონაცემთა სუბიექტის უფლების შეზღუდვასა და განხორციელებაზე უარის თქმის შესახებ ... სასამართლოს გადაწყვეტილება უნდა ეცნობოს მონაცემთა სუბიექტს, გარდა იმ შემთხვევისა, თუ ინფორმაციის მიწოდება საფრთხეს შეუქმნის ამ მუხლის მეორე პუნქტით გათვალისწინებული მიზნის (მიზნების) მიღწევას.
5. მონაცემთა სუბიექტის ამ დებულების მე-6, მე-10 და მე-11 მუხლებით გათვალისწინებული უფლებების განხორციელება უზრუნველყოფილი უნდა იყოს უსასყიდლოდ, გარდა შესაბამისი მუხლებით დადგენილი გამონაკლისებისა. მონაცემთა სუბიექტის მიერ მოთხოვნის არაგონივრული სიხშირით წარდგენის შემთხვევაში, სენაკის რაიონული (მათ შორის აბაშისა და მარტვილის მაგისტრატი) სასამართლო უფლებამოსილია, უარი განაცხადოს მის შესრულებაზე, რის შესახებაც, ვალდებულია, დაუყოვნებლივ წერილობით აცნობოს მონაცემთა სუბიექტს და განუმარტოს გასაჩივრების უფლების შესახებ.
6. მონაცემთა სუბიექტის უფლების შეზღუდვისა და მის მოთხოვნაზე უარის თქმის შემთხვევაში მტკიცების ტვირთი ეკისრება სენაკი რაიონულ (მათ შორის აბაშისა და მარტვილის მაგისტრატი) სასამართლოს.

მუხლი 8. გასაჩივრების უფლება

მონაცემთა სუბიექტს უფლება აქვს, „პერსონალურ მონაცემთა დაცვის შესახებ“ კანონით გათვალისწინებული უფლებებისა და დადგენილი წესების დარღვევის შემთხვევაში კანონით დადგენილი წესით მიმართოს პერსონალურ მონაცემთა დაცვის სამსახურს ან სასამართლოს.

თავი IV

სენაკის რაიონული (მათ შორის აბაშისა და მარტვილის მაგისტრატი)

სასამართლოს ვალდებულებები

მუხლი 9. მონაცემთა დამუშავებასთან დაკავშირებული ზოგადი ინფორმაციის აღრიცხვა და

პერსონალურ მონაცემთა დაცვის სამსახურისთვის შეტყობინება

მონაცემთა დამუშავებასთან დაკავშირებული ინფორმაციის აღრიცხვა და პერსონალურ მონაცემთა დაცვის სამსახურისთვის შეტყობინება ხორციელდება „პერსონალურ მონაცემთა დაცვის შესახებ“ საქართველოს კანონის 28-ე მუხლის შესაბამისად, იმ თავისებურებების გათვალისწინებით, რომლებიც მომდინარეობს მონაცემთა დამუშავებაზე უფლებამოსილი პირის სამართლებრივი სტატუსის სპეციფიკიდან.

მუხლი 10. მონაცემთა სუბიექტის ინფორმირება მონაცემთა უშუალოდ მისგან შეგროვების შემთხვევაში

1. სენაკის რაიონული (მათ შორის აბაშისა და მარტვილის მაგისტრატი) სასამართლო ვალდებულია მონაცემთა სუბიექტს მიაწოდოს მონაცემთა დამუშავებასთან დაკავშირებით, ამ მუხლით განსაზღვრული ინფორმაცია, მონაცემთა შეგროვებამდე ან შეგროვების უშუალოდ დაწყებისთანავე.
2. მონაცემთა სუბიექტის ინფორმირების ვალდებულება შესრულებულად მიიჩნევა:
 - ა) დებულების სასამართლოს ვებ-გვერდზე განთავსებით, გარდა იმ შემთხვევისა, როდესაც მონაცემთა სუბიექტი ამ ინფორმაციის წერილობით მიღებას ითხოვს;
 - ბ) აგრეთვე, დამუშავების კონტექსტის გათვალისწინებით, ამ დებულების შესახებ ინფორმაციის სასამართლოს შენობაში მონაცემთა სუბიექტისათვის ადვილად ხელმისაწვდომ ადგილებში განთავსებით, სადაც თვალსაჩინო და აღქმადი წარწერით მიეთითება მონაცემთა დამუშავების პირობების შესახებ, რომელშიც ინტეგრირებულია დებულების სრულ ტექსტზე ან მის ცალკეულ ნაწილზე, დამატებითი ძალისხმევის გარეშე, დაუბრკოლებლად წვდომისა და გაცნობის შესაძლებლობის უზრუნველყოფის საყოველთაოდ აღიარებული ტექნიკური საშუალებები.
3. ამ მუხლის პირველი პუნქტით გათვალისწინებული ვალდებულების შესრულების მიზნით, სენაკის რაიონული (მათ შორის აბაშისა და მარტვილის მაგისტრატი) სასამართლო მონაცემთა სუბიექტს მიაწვდის შემდეგ ინფორმაციას:
 - ა) სენაკის რაიონული (მათ შორის აბაშისა და მარტვილის მაგისტრატი) სასამართლოს (ასეთის არსებობის შემთხვევაში, დამუშავებაზე უფლებამოსილი პირის) საკონტაქტო ინფორმაციას;
 - ბ) მონაცემთა დამუშავების მიზნებისა და სამართლებრივი საფუძვლის შესახებ;
 - დ) ასეთი საჭიროების არსებობის შემთხვევაში, მონაცემთა მიწოდების სავალდებულობის შესახებ, ხოლო თუ მონაცემთა მიწოდება სავალდებულოა – მონაცემთა მიწოდებაზე უარის თქმის სამართლებრივი შედეგების თაობაზე, აგრეთვე ინფორმაციას იმის შესახებ, რომ მონაცემთა შეგროვება/მოპოვება გათვალისწინებულია საქართველოს კანონმდებლობით ან აუცილებელი პირობაა ხელშეკრულების დასადაბად;
 - ე) პერსონალურ მონაცემთა დაცვის ოფიცრის ვინაობა და საკონტაქტო ინფორმაცია;
 - ვ) ასეთის არსებობის შემთხვევაში, მონაცემთა მიმღების ვინაობა ან მონაცემთა მიმღებთა კატეგორიები;
 - ზ) მონაცემთა დაგეგმილი გადაცემისა და მონაცემთა დაცვის სათანადო გარანტიების არსებობის შესახებ, მათ შორის, მონაცემთა გადაცემაზე ნებართვის თაობაზე (ასეთის არსებობის შემთხვევაში), თუ დამუშავებისთვის პასუხისმგებელი პირი გეგმავს მონაცემთა სხვა სახელმწიფოსთვის ან საერთაშორისო ორგანიზაციისთვის გადაცემას;
 - თ) მონაცემთა შენახვის ვადის შესახებ, ხოლო თუ კონკრეტული ვადის განსაზღვრა შეუძლებელია, ვადის განსაზღვრის ზოგადი კრიტერიუმების თაობაზე;
 - ი) მონაცემთა სუბიექტის ამ დებულებით გათვალისწინებული უფლებების შესახებ.

მუხლი 11. მონაცემთა სუბიექტის ინფორმირება თუ მონაცემების შეგროვება უშუალოდ მისგან არ ხდება

1. სენაკის რაიონული (მათ შორის აბაშისა და მარტვილის მაგისტრატი) სასამართლო (ან დამუშავებაზე უფლებამოსილი პირი) არ არის ვალდებული მონაცემთა სუბიექტს მიაწოდოს ამ დებულების მე-10 მუხლით გათვალისწინებული ინფორმაცია, აგრეთვე აცნობოს, მის შესახებ რომელი მონაცემები მუშავდება და ამ მონაცემთა მოპოვების წყარო, მათ შორის, მოპოვებულ იქნა თუ არა მონაცემები საჯაროდ ხელმისაწვდომი წყაროდან, იმ შემთხვევაში თუ სახეზეა ერთ-ერთი შემდეგი საფუძველი:
 - ა) მონაცემთა სუბიექტი უკვე ფლობს ასეთ ინფორმაციას;

ბ) მონაცემთა შეგროვება ან გამჟღავნება დადგენილია კანონით ან საჭიროა საქართველოს კანონმდებლობით დაკისრებული მოვალეობის შესასრულებლად;

გ) ინფორმაციის მიწოდება შეუძლებელია ან მოითხოვს არაპროპორციულად დიდ ძალისხმევას;

დ) ასეთი ვალდებულების შესრულება მნიშვნელოვან ზიანს მიაყენებს ან შეუძლებელს გახდის მონაცემთა დამუშავების კანონიერი მიზნის (მიზნების) შესრულებას.

2. ამ მუხლის პირველი პუნქტით გათვალისწინებულ შემთხვევაში, სენაკის რაიონულ (მათ შორის აბაშისა და მარტვილის მაგისტრატ) სასამართლოში დანერგილია სათანადო ზომები მონაცემთა სუბიექტის უფლებებისა და ლეგიტიმური ინტერესების დასაცავად.

მუხლი 12. მონაცემთა უსაფრთხოება

1. სენაკის რაიონულ (მათ შორის აბაშისა და მარტვილის მაგისტრატ) სასამართლოში მონაცემთა დასაცავად მიღებულია სათანადო ტექნიკური და ორგანიზაციული ზომები მონაცემთა დამუშავების შესაძლო და თანამდევ საფრთხეების აღსაკვეთად, მონაცემთა დაკარგვის, უკანონო დამუშავების, მათ შორის, განადგურების, წაშლის, შეცვლის, გამჟღავნების ან გამოყენების პრევენციის მიზნით.
2. ორგანიზაციული და ტექნიკური ზომების სახეობა (მათ შორის, მონაცემთა ფსევდონიმიზაცია, მონაცემებზე წვდომის აღრიცხვა, ინფორმაციული უსაფრთხოების მექანიზმები, როგორცაა კონფიდენციალურობა, მთლიანობა, ხელმისაწვდომობა და ა.შ.) და მისი მონაცემთა უსაფრთხოების პრინციპთან შესაბამისობა განისაზღვრება სასამართლოს გამგებლობის სფეროში შემავალი შესაბამისი სტრუქტურული ერთეულის საქმიანობის სპეციფიკის მიხედვით, მონაცემთა კატეგორიების, მათი მოცულობის, დამუშავების მიზნის, ფორმის, საშუალებების, უპირატესად, მონაცემთა სუბიექტის უფლებების დარღვევის შესაძლო საფრთხეების გათვალისწინებით.
3. ამ მუხლის მე-2 და მე-4 პუნქტებით დადგენილი წესის შესაბამისად, სენაკის რაიონული (მათ შორის აბაშისა და მარტვილის მაგისტრატ) სასამართლო, საჭიროების შემთხვევაში, პერიოდულად აფასებს მონაცემთა უსაფრთხოების უზრუნველსაყოფად მიღებულ ტექნიკურ და ორგანიზაციულ ზომებს, მათ ქმედითობას, აგრეთვე, უზრუნველყოფს მონაცემთა უსაფრთხოების დასაცავად ადეკვატური ზომების მიღებას ან/და არსებულის განახლებას.
4. ორგანიზაციული და ტექნიკური ზომების შემუშავების, ცვლილების ან/და განახლებისას, მხედველობაში მიიღება მათი იმპლემენტაციის ხარჯები არაპროპორციულად დიდი ძალისხმევის, რესურსების ან/და დროის საჭიროების თვალსაზრისით.
5. ავტომატური და ნახევრად ავტომატური ფორმით დამუშავებული მონაცემების მიმართ შესრულებული ყველა მოქმედება, მათ შორის, ინფორმაცია ინციდენტების შესახებ, მონაცემთა შეგროვების, შეცვლის, მათზე წვდომის, მათი გამჟღავნების (გადაცემის), დაკავშირებისა და წაშლის თაობაზე, ექვემდებარება აღრიცხვას. არაავტომატური ფორმით დამუშავებული მონაცემების გამჟღავნებასთან ან/და ცვლილებასთან დაკავშირებული ყველა მოქმედება, მათ შორის, ინციდენტების შესახებ ინფორმაცია, ექვემდებარება აღრიცხვას.
6. ნებისმიერი უფლებამოსილი მოხელე, რომელიც მონაწილეობს მონაცემთა დამუშავებაში ან რომელსაც აქვს მონაცემებზე წვდომა, ვალდებულია, არ გასცდეს მისთვის მინიჭებული უფლებამოსილების ფარგლებს, დაიცვას მონაცემთა საიდუმლოება და კონფიდენციალურობა, მათ შორის, სამსახურებრივი უფლებამოსილების შეწყვეტის შემდეგ.

მუხლი 13. ინციდენტის შესახებ პერსონალურ მონაცემთა დაცვის სამსახურისთვის შეტყობინების ვალდებულება

1. ინციდენტთან დაკავშირებული ნებისმიერი პროცესის მართვა, ადმინისტრირება და კოორდინირება ხორციელდება „პერსონალურ მონაცემთა დაცვის შესახებ“ საქართველოს კანონით და ადამიანის ძირითადი უფლებებისა და თავისუფლებებისთვის მნიშვნელოვანი

საფრთხის შემცველი ინციდენტის განსაზღვრის კრიტერიუმებისა და პერსონალურ მონაცემთა დაცვის სამსახურისთვის ინციდენტის შეტყობინების წესის დამტკიცების შესახებ პერსონალურ მონაცემთა დაცვის სამსახურის უფროსის მიერ გამოცემული ნორმატიული აქტით დადგენილი წესით.

2. სენაკის რაიონული (მათ შორის აბაშისა და მარტვილის მაგისტრატი) სასამართლო ვალდებულია აღრიცხოს ინციდენტი, დამდგარი შედეგი, მიღებული ზომები და ინციდენტის აღმოჩენიდან არაუგვიანეს 72 საათისა მის შესახებ წერილობით ან ელექტრონულად შეატყობინოს პერსონალურ მონაცემთა დაცვის სამსახურს, გარდა იმ შემთხვევისა, როდესაც ნაკლებსავარაუდოა, რომ ინციდენტი მნიშვნელოვან ზიანს გამოიწვევს ან/და მნიშვნელოვან საფრთხეს შეუქმნის ადამიანის ძირითად უფლებებსა და თავისუფლებებს.
3. სენაკის რაიონული (მათ შორის აბაშისა და მარტვილის მაგისტრატი) სასამართლო იღებს გონივრულ ზომებს დამუშავებაზე უფლებამოსილი პირისთვის ინციდენტის მართვის შესახებ ინფორმაციის მიწოდების მიზნით, აგრეთვე, იმის უზრუნველსაყოფად, რომ დამუშავებაზე უფლებამოსილმა პირმა სენაკის რაიონულ (მათ შორის აბაშისა და მარტვილის მაგისტრატ) სასამართლოს დაუყოვნებლივ აცნობოს ინციდენტის ან ინციდენტის დადგომის გონივრული რისკის შესახებ არსებული ნებისმიერი ხელშესახები ინფორმაცია.
4. თუ კანონით გათვალისწინებული ინფორმაციის ერთიანად და სრულად მიწოდება შეუძლებელია ან მოითხოვს არათანაზომიერ ძალისხმევას, სენაკის რაიონული (მათ შორის აბაშისა და მარტვილის მაგისტრატი) სასამართლო, პერსონალურ მონაცემთა დაცვის ოფიცრის ჩართულობით და პერსონალურ მონაცემთა დაცვის სამსახურთან შეთანხმებით, გონივრულ ვადაში, ეტაპობრივად ახდენს ამ ინფორმაციის მიწოდებას.
5. იმ შემთხვევაში თუ ინციდენტის თაობაზე მონაცემთა სუბიექტის (მონაცემთა სუბიექტების) ინფორმირება, ინციდენტის გარემოებების, სავარაუდო ზიანის ან/და მონაცემთა სუბიექტების რაოდენობის გათვალისწინებით, პერსონალურ მონაცემთა დაცვის სამსახურისთვის წარდგენილი შეტყობინების თანახმად, შეტყობინების დამაბრკოლებელი გარემოებებიდან გამომდინარე, არ არის უზრუნველყოფილი, პერსონალურ მონაცემთა დაცვის სამსახური, ინციდენტის შესახებ მის ხელთ არსებული ინფორმაციის გასაჯაროების შესახებ გადაწყვეტილებას იღებს სენაკის რაიონული (მათ შორის აბაშისა და მარტვილის მაგისტრატი) სასამართლოსთან ურთიერთშეთანხმებით, „პერსონალურ მონაცემთა დაცვის შესახებ“ საქართველოს კანონის 30-ე მუხლის მე-3 პუნქტით დაცული ლეგიტიმური მიზნების გათვალისწინებით.
6. ამ მუხლის მე-5 პუნქტით დადგენილი წესი არ მოქმედებს თუ პერსონალურ მონაცემთა დაცვის სამსახურისთვის გაგზავნილი შეტყობინება შეიცავს სენაკის რაიონული (მათ შორის აბაშისა და მარტვილის მაგისტრატი) სასამართლოს მითითებას, რომ ინციდენტის შესახებ ინფორმაციის გასაჯაროება საფრთხეს შეუქმნის საქართველოს კანონმდებლობით დაცული სასამართლოს უფლებამოსილების სფეროში შემავალი ლეგიტიმური მიზნების მიღწევას.

მუხლი 14. ინციდენტის შესახებ მონაცემთა სუბიექტის ინფორმირების ვალდებულება

1. თუ ინციდენტი მაღალი ალბათობით გამოიწვევს მნიშვნელოვან ზიანს ან/და მნიშვნელოვან საფრთხეს შეუქმნის ადამიანის ძირითად უფლებებსა და თავისუფლებებს, სენაკის რაიონული (მათ შორის აბაშისა და მარტვილის მაგისტრატი) სასამართლო ვალდებულია, ინციდენტის აღმოჩენიდან პირველი შესაძლებლობისთანავე, გაუმართლებელი დაყოვნების გარეშე აცნობოს მონაცემთა სუბიექტს ინციდენტის შესახებ, აგრეთვე, მარტივ და მისთვის გასაგებ ენაზე მიაწოდოს საქართველოს კანონმდებლობით გათვალისწინებული შემდეგი ინფორმაცია:
 - ა) ინციდენტისა და მასთან დაკავშირებული გარემოებების ზოგადი აღწერა;
 - ბ) ინციდენტით გამოწვეული სავარაუდო/დამდგარი ზიანის, მის შესამცირებლად ან აღმოსაფხვრელად განხორციელებული ან დაგეგმილი ღონისძიებების შესახებ;
 - გ) პერსონალურ მონაცემთა დაცვის ოფიცრის ან სხვა პირის საკონტაქტო მონაცემები.

2. თუ მონაცემთა სუბიექტის ინფორმირება არაპროპორციულად დიდ ხარჯებს ან ძალისხმევას მოითხოვს, სენაკის რაიონული (მათ შორის აბაშისა და მარტვილის მაგისტრატი) სასამართლო ამ მუხლის პირველი პუნქტით გათვალისწინებულ ინფორმაციას გაავრცელებს საჯაროდ ან სხვა ისეთი ფორმით, რომელიც ჯეროვნად უზრუნველყოფს მონაცემთა სუბიექტის მიერ ინფორმაციის მიღების შესაძლებლობას.
3. ამ მუხლის პირველი და მე-2 პუნქტებით გათვალისწინებული ვალდებულება არ წარმოიშობა საქართველოს კანონმდებლობით გათვალისწინებულ შემთხვევებში ან მაშინ როდესაც მიღებულია შესაბამისი უსაფრთხოების ზომები, რომლის შედეგადაც თავიდან იქნა აცილებული ადამიანის ძირითადი უფლებებისა და თავისუფლებების დარღვევის მნიშვნელოვანი საფრთხე.

მუხლი 15. მონაცემთა დაცვაზე ზეგავლენის შეფასება

1. სენაკის რაიონული (მათ შორის აბაშისა და მარტვილის მაგისტრატი) სასამართლო ვალდებულია, მონაცემთა დამუშავების პროცესის დაწყებამდე ან მისი ცვლილების/განახლების შემთხვევაში, განხორციელოს მონაცემთა დაცვაზე ზეგავლენის შეფასება იმ შემთხვევაში თუ მონაცემთა დამუშავებისას ახალი ტექნოლოგიების, მონაცემთა კატეგორიის, მოცულობის, მონაცემთა დამუშავების მიზნებისა და საშუალებების გათვალისწინებით, მაღალი ალბათობით იქმნება ადამიანის ძირითადი უფლებებისა და თავისუფლებების შელახვის საფრთხე.
2. მონაცემთა დაცვაზე ზეგავლენის შეფასება ხორციელდება „პერსონალურ მონაცემთა დაცვის შესახებ საქართველოს კანონით“ და მონაცემთა დაცვაზე ზეგავლენის შეფასების ვალდებულების წარმოშობი გარემოებების დადგენის კრიტერიუმებისა და მისი შეფასების განხორციელების წესების შესახებ პერსონალურ მონაცემთა დაცვის სამსახურის უფროსის მიერ გამოცემული ნორმატიული აქტით დადგენილი წესით.
3. მონაცემთა დაცვაზე ზეგავლენის შეფასებისას, სენაკის რაიონული (მათ შორის აბაშისა და მარტვილის მაგისტრატი) სასამართლო ქმნის შესაბამის წერილობით დოკუმენტს ამ მუხლის მე-2 პუნქტით დადგენილი წესის შესაბამისად, ხოლო, მონაცემთა დამუშავების პროცესის არსებითი ცვლილების შემთხვევაში, განახლებს მას პერსონალურ მონაცემთა დამუშავების პროცესში წარმოშობილი რისკების გათვალისწინებით.

მუხლი 16. პერსონალურ მონაცემთა დაცვის ოფიცერი

1. „პერსონალურ მონაცემთა დაცვის შესახებ“ საქართველოს კანონის 33-ე მუხლის 1-ლი და მე-4 პუნქტების შესაბამისად, საქართველოს იუსტიციის უმაღლესი საბჭო განსაზღვრავს პერსონალურ მონაცემთა დაცვის ოფიცერს სასამართლოებისთვის, მათ შორის, სენაკის რაიონული (მათ შორის აბაშისა და მარტვილის მაგისტრატი) სასამართლოსთვისაც, რომლის ვინაობა და საკონტაქტო ინფორმაცია ხელმისაწვდომია სენაკის რაიონული სასამართლოს ვებ-გვერდზე.
2. პერსონალურ მონაცემთა დაცვის ოფიცერი, საკუთარი ფუნქციების განხორციელების პროცესში, პერსონალურ მონაცემთა დაცვის მიზნით, უზრუნველყოფს:
 - ა) მონაცემთა დაცვასთან დაკავშირებულ საკითხებზე, მათ შორის, მარეგულირებელი სამართლებრივი ნორმების მიღების ან შეცვლის შესახებ, სენაკის რაიონული (მათ შორის აბაშისა და მარტვილის მაგისტრატი) სასამართლოს (ან/და დამუშავებაზე უფლებამოსილი პირის) თანამშრომელთა ინფორმირებას, მათთვის კონსულტაციისა და მეთოდური დახმარების გაწევას;
 - ბ) მონაცემთა დამუშავებასთან დაკავშირებული შიდა რეგულაციებისა და მონაცემთა დაცვაზე ზეგავლენის შეფასების დოკუმენტის შემუშავებაში მონაწილეობას, აგრეთვე სენაკის რაიონული (მათ შორის აბაშისა და მარტვილის მაგისტრატი) სასამართლოს (ან/და დამუშავებაზე უფლებამოსილი პირის) მიერ საქართველოს კანონმდებლობისა და შიდა ორგანიზაციული დოკუმენტების შესრულების მონიტორინგს;

- გ) მონაცემთა დამუშავებასთან დაკავშირებით შემოსული განცხადებებისა და საჩივრების ანალიზსა და შესაბამისი რეკომენდაციების გაცემას;
- დ) პერსონალურ მონაცემთა დაცვის სამსახურისგან კონსულტაციების მიღებას, სენაკის რაიონული (მათ შორის აბაშისა და მარტვილის მაგისტრატი) სასამართლოს (ან/და დამუშავებაზე უფლებამოსილი პირის) წარმომადგენლობას პერსონალურ მონაცემთა დაცვის სამსახურთან ურთიერთობაში, მისი მოთხოვნით ინფორმაციისა და დოკუმენტების წარდგენას და მისი დავალებებისა და რეკომენდაციების შესრულების კოორდინაციასა და მონიტორინგს;
- ე) მონაცემთა სუბიექტის მიმართვის შემთხვევაში მისთვის მონაცემთა დამუშავების პროცესებისა და მისი უფლებების შესახებ ინფორმაციის მიწოდებას;
- ვ) სენაკის რაიონული (მათ შორის აბაშისა და მარტვილის მაგისტრატი) სასამართლოს (ან/და დამუშავებაზე უფლებამოსილი პირის) მიერ მონაცემთა დამუშავების სტანდარტების ამდლების მიზნით სხვა ფუნქციების შესრულებას.
3. პერსონალურ მონაცემთა დაცვის ოფიცერი თავისი საქმიანობაში დამოუკიდებელია და ემორჩილება მხოლოდ საქართველოს კონსტიტუციას, მონაცემთა დაცვის სფეროში აღიარებულ საერთაშორისო სამართლებრივ პრინციპებს, „პერსონალურ მონაცემთა დაცვის შესახებ“ საქართველოს კანონს და სხვა სამართლებრივ აქტებს.
 4. პერსონალურ მონაცემთა დაცვის ოფიცერი სათანადოდ არის ჩართული მონაცემთა დამუშავებასთან დაკავშირებით მნიშვნელოვანი გადაწყვეტილების მიღების პროცესში, იგი უზრუნველყოფილია შესაბამისი რესურსებითა და ინფორმაციით.
 5. სენაკის რაიონული (მათ შორის აბაშისა და მარტვილის მაგისტრატი) სასამართლო, პერსონალურ მონაცემთა დაცვის ოფიცრის დროებითი არყოლისას ან მისი უფლებამოსილების შეწყვეტისას, ვალდებულია გაუმართლებელი დაყოვნების გარეშე ასეთი უფლებამოსილებით აღჭურვის სხვა პირი.

თავი V

პერსონალურ მონაცემთა დამუშავებასთან დაკავშირებული პროცესები შესაბამისი სტრუქტურული ერთეულების მიხედვით

მუხლი 17. ვიდეომონიტორინგის განხორციელება

1. ვიდეო მონიტორინგის განხორციელების წესების მიზანია სენაკის რაიონული (მათ შორის აბაშისა და მარტვილის მაგისტრატი) სასამართლოს, როგორც პერსონალურ მონაცემთა დამუშავებაზე პასუხისმგებელი პირის მიერ, ვიდეო მონიტორინგის განხორციელების პროცესში „პერსონალურ მონაცემთა დაცვის შესახებ“ საქართველოს კანონის დაცვის უზრუნველსაყოფად, ვიდეომონიტორინგის სპეციფიკის გათვალისწინებით, მისი მიზნისა და მოცულობის, ხანგრძლივობის, ვიდეო ჩანაწერებზე წვდომის, მათი შენახვისა და განადგურების წესისა და პირობების, მონაცემთა სუბიექტის უფლებების დაცვის მექანიზმების განსაზღვრის გამჭვირვალე პროცედურების დადგენა.
2. ამ მუხლის მიზნებისთვის, ვიდეომონიტორინგი გულისხმობს სენაკის რაიონულ (მათ შორის აბაშისა და მარტვილის მაგისტრატ) სასამართლოში განთავსებული და დამონტაჟებული ტექნიკური საშუალებების ერთობლიობას, რომლის გამოყენებითაც ხორციელდება ვიზუალური გამოსახულების მონაცემთა დამუშავება, კერძოდ, ვიდეოკონტროლი ან/და ვიდეოჩაწერა.
3. სენაკის რაიონულ (მათ შორის აბაშისა და მარტვილის მაგისტრატ) სასამართლოში ვიდეომონიტორინგი ხორციელდება ჩამოთვლილთაგან ერთ-ერთი ან რამდენიმე ლეგიტიმური მიზნის მისაღწევად:
 - ა) დანაშაულის თავიდან აცილებისა და მისი გამოვლენის მიზნით;
 - ბ) საზოგადოებრივი უსაფრთხოების დაცვის მიზნით
 - გ) პირის უსაფრთხოებისა და საკუთრების დაცვის მიზნით;

- დ) სასამართლოში წესრიგის დაცვის, უსაფრთხოების უზრუნველყოფისა და სამართალდარღვევის გამოვლენისა და მათზე რეაგირების მიზნით;
- ე) სასამართლოს შენობის/ეზოს (მისი გარე პერიმეტრის) და მასში მყოფი პირების უსაფრთხოების უზრუნველყოფის მიზნით;
- ვ) სასამართლოს შენობასა და ეზოში (და მის გარე პერიმეტრში) წესრიგის დაცვის უზრუნველყოფის მიზნით;
- ზ) სასამართლოს შენობაში სტუმრებისა და დამთვალეირებლების დაშვების და დადგენილი წესით გადაადგილების პროცესის წარმართვის მიზნით;
- თ) აგრეთვე, სენაკის რაიონული (მათ შორის აბაშისა და მარტვილის მაგისტრატი) სასამართლოს გამგებლობის სფეროში შემავალი სხვა საჯარო ან/და სხვა ლეგიტიმური ინტერესის სფეროსთვის მიკუთვნებული ამოცანების შესრულების მიზნით.
4. ვიდეომონიტორინგი ხორციელდება უწყვეტ რეჟიმში, დამონტაჟებული კამერების მეშვეობით გადმოცემული ვიზუალური გამოსახულების შემცველი ინფორმაციის სისტემატური კონტროლის გზით, რომელიც მოიცავს სენაკის რაიონული (მათ შორის აბაშისა და მარტვილის მაგისტრატი) სასამართლოს შენობის შიდა და გარე პერიმეტრს, მათ შორის, მისაღებ სივრცეებს (აუდიო ჩაწერა), დერეფნებს, შემოსასვლელსა და გასასვლელს, ეზოს და ავტოსადგომს, კერძოდ:
- ა) მანდატურის სამსახურის მანდატური, ვიდეომონიტორინგის შედეგის პირდაპირი ტრანსლირების შედეგად, რეალურ დროში ახორციელებს მოქალაქეთა მისაღების, სასამართლო დარბაზების სივრცის, სასამართლოს ეზოს, ავტოსადგომის, გარე პერიმეტრის, ადმინისტრაციული ნაწილის შესასვლელის ვიდეომეთვალყურეობას;
- ბ) მანდატურის სამსახურის უფროსი ვიდეომონიტორინგის შედეგის პირდაპირი ტრანსლირებით, რეალურ დროში, ახორციელებს მოქალაქეთა მისაღების, სასამართლო დარბაზების სივრცის, სასამართლოს ეზოს, ავტოსადგომის, გარე პერიმეტრის, ადმინისტრაციული ნაწილის შესასვლელის და ამავე ნაწილის შიდა დერეფნების ვიდეომეთვალყურეობას.
5. ვიდეოჩანაწერები ინახება საქართველოს იუსტიციის უმაღლეს საბჭოსთან არსებული სსიპ „საერთო სასამართლოების დეპარტამენტის“ და სენაკის რაიონული (მათ შორის აბაშისა და მარტვილის მაგისტრატი) სასამართლოს შენობაში განთავსებულ სერვერებზე თხუთმეტი დღის ვადით და ახალი ჩანაწერის გაკეთება ხდება ძველზე გადაწერის გზით - რაც იწვევს ძველი ჩანაწერების ავტომატურ წაშლას.
6. ამ მუხლის მე-4 პუნქტის „ა“ ქვეპუნქტით გათვალისწინებულ შემთხვევაში, ვიდეოკამერების ჩანაწერებთან წვდომა ხდება მხოლოდ რეალურ დროში, მანდატურის სამსახურის წარმომადგენლების მიერ, ხოლო, „ბ“ ქვეპუნქტით გათვალისწინებულ შემთხვევაში, ვიდეოკამერების ჩანაწერებთან წვდომა ხდება როგორც რეალურ დროში, ასევე, შესაძლებელია ვიდეოკამერის ჩანაწერის ნახვა, გადახვევა და სხვა მოწყობილობაზე ჩაწერა მანდატურის სამსახურის უფროსისა და ქსელის ადმინისტრატორის მიერ. ტექნიკური ხარვეზის შემთხვევაში, ვიდეოკამერების ჩანაწერებთან წვდომა ენიჭება იუსტიციის უმაღლესი საბჭოს ინფორმაციული ტექნოლოგიების უფროს ინჟინერს ან/და სსიპ საერთო სასამართლოების დეპარტამენტის ინფორმატიზაციის და კავშირგაბმულობის განყოფილების მთავარ სპეციალისტს.
7. ამ მუხლის მე-4 პუნქტით გათვალისწინებული ვიდეოკამერები დაკავშირებულია მანდატურის სამსახურის უფროსის კომპიუტერულ მოწყობილობებთან, კერძოდ:
- ა) უზრუნველყოფილია ვიდეომონიტორინგის სისტემის და სერვერის ფიზიკური უსაფრთხოება: ოთახი, რომელშიც განთავსებულია სერვერი, დაცულია 24 საათის განმავლობაში, მასში დაიშვებიან მხოლოდ სასამართლოს მენეჯერი, მანდატურის სამსახურის უფროსი, ქსელის ადმინისტრატორი და ტექნიკური ხარვეზის გამოვლენის შემთხვევაში - იუსტიციის უმაღლესი საბჭოს ინფორმაციული ტექნოლოგიების უფროსი ინჟინერი ან/და სსიპ საერთო სასამართლოების დეპარტამენტის ინფორმატიზაციის და

კავშირგაბმულობის განყოფილების მთავარი სპეციალისტი. სასამართლოს ადმინისტრაციულ ნაწილში დამონტაჟებული და სერვერთან დაკავშირებული ყველა მოწყობილობა განთავსებულია სპეციალურ დალუქულ სათავსოში;

ბ) სსიპ საერთო სასამართლოების დეპარტამენტის უფლებამოსილი პირი ახდენს მანდატურის სამსახურის უფროსის სამსახურებრივი კომპიუტერის IP მისამართის დაშვებას იმ სერვერებთან, რომელიც დაკავშირებულია ვიდეოკამერებთან (სისტემაში შესასვლელად ენიჭება მომხმარებლის სახელი და პაროლი).

8. შესაძლებელია, ვიდეოჩანაწერები - მათზე წვდომის ან დათვალიერების მიზნით - გამჟღავნდეს ან მესამე პირს გადაეცეს მხოლოდ საქართველოს კანონმდებლობით გათვალისწინებული ლეგიტიმური მიზნების არსებობისას, შესაბამისი მოთხოვნის საფუძველზე.
9. ამ მუხლის მე-4 პუნქტით გათვალისწინებული ვიდეოკამერების გადახვევა და სხვა ფაილზე ჩაწერა შესაძლებელია სასამართლოს მენეჯერის მის მიერ განსაზღვრული პირის მიერ. განსაზღვრული ლეგიტიმური მიზნის მიღწევის შემდეგ, ამოღებული ჩანაწერის განადგურების ვალდებულება ეკისრება პირს, რომელმაც აღნიშნული ქმედება განახორციელა.
10. ვიდეომონიტორინგის სისტემისა და ვიდეოჩანაწერების უკანონო ხელყოფის, მისი შემთხვევითი გამჟღავნებისა და გამოყენებისაგან დაცვის ორგანიზაციულ-ტექნიკური ზომების გათვალისწინებით, ამ მუხლის მე-4 პუნქტით გათვალისწინებული ვიდეოკამერების ჩანაწერებთან უკანონო წვდომის ფაქტის გამოვლენისა და პრევენციის, აგრეთვე, უკანონო წვდომის განმახორციელებელი პირის იდენტიფიცირების უზრუნველყოფის მიზნით, სსიპ საერთო სასამართლოების დეპარტამენტის უფლებამოსილი პირი ახდენს იმ მომხმარებლის იდენტიფიცირებას და შენახვას („ლოგირება“), რომელსაც ელექტრონულად ჰქონდა წვდომა ვიდეოკამერების ჩანაწერებთან („წვდომის დრო და მომხმარებლის სახელი“). აღნიშნული მონაცემები ინახება სამი წლის ვადით, თუ სახეზე არაა მონაცემების შენახვის კანონმდებლობით გათვალისწინებული სხვა საფუძველი.
11. ვიდეოკამერების ჩანაწერებთან არაავტორიზებული წვდომის ან ინციდენტის დაფიქსირების შემთხვევაში, სსიპ საერთო სასამართლოების დეპარტამენტის უფლებამოსილი პირი ატყობინებს სასამართლოს მენეჯერს და პერსონალურ მონაცემთა დაცვის ოფიცერს. ვიდეოჩანაწერების სერვერებთან არაავტორიზებული წვდომის ან ინციდენტის დაფიქსირების შემთხვევაში, სასამართლოს მენეჯერი აღნიშნულის შესახებ ატყობინებს პერსონალურ მონაცემთა დაცვის ოფიცერს.
12. აკრძალულია ვიდეომონიტორინგის შედეგის რეალურ დროში, პირდაპირი ტრანსლირების ფოტო ან ვიდეოგადაღება ან მისი შინაარსის სხვაგვარი ფიქსაცია. აღნიშნული აკრძალვის დარღვევა იწვევს საქართველოს კანონმდებლობით გათვალისწინებულ პასუხისმგებლობას.
13. ვიდეოკამერების რაოდენობისა და რეჟიმის ცვლილებას ახდენს სსიპ საერთო სასამართლოების დეპარტამენტი, სენაკის რაიონული სასამართლოს თავმჯდომარის ან მენეჯერის თანხმობით.
14. სენაკის რაიონული (მათ შორის აბაშისა და მარტვილის მაგისტრატი) სასამართლოში პირადი სამუშაო პროცესის/სივრცის ვიდეომონიტორინგი არ ხორციელდება, გარდა იმ შემთხვევებისა, როდესაც სასამართლოს შესაბამისი მოხელის მიერ საკუთარი ფუნქციების შესრულებისას გარდაუვალია ვიდეომონიტორინგის გზით კონტროლირებად სივრცეში მოხვედრა.
15. სენაკის რაიონული (მათ შორის აბაშისა და მარტვილის მაგისტრატი) სასამართლოში არსებული დროებითი მოთავსების იზოლატორის საკნების შიდა სივრცეში პირთა უსაფრთხოების უზრუნველყოფის მიზნით, ვიდეომონიტორინგის შედეგს, ამავე სივრცეში განთავსებულ მონიტორზე, რეალურ დროში თვალს ადევნებს საქართველოს იუსტიციის სამინისტროს მმართველობის სფეროში მოქმედი სახელმწიფო საქვეუწყებო დაწესებულების

- სპეციალური პენიტენციური სამსახურის უფლებამოსილი თანამშრომელი, რომელიც კონკრეტულ დროს სასამართლოს შენობაში იმყოფება.

16. სენაკის რაიონული (მათ შორის აბაშისა და მარტვილის მაგისტრატი) სასამართლოს შენობაში, მის ეზოსა და გარე პერიმეტრზე განთავსებულია თვალსაჩინო გამაფრთხილებელი ნიშანი ვიდეომონიტორინგის მიმდინარეობის შესახებ.

მუხლი 18. აუდიო მონიტორინგი

1. სენაკის რაიონულ სასამართლოს შენობაში (მისაღებში) და საბადრაგოში ხორციელდება აუდიო მონიტორინგი „პერსონალურ მონაცემთა დაცვის შესახებ“ საქართველოს კანონით დადგენილი წესით. აუდიო მონიტორინგის მთავარი მიზანია ხარისხის კონტორილის უზრუნველყოფა, სასამართლოს შენობაში წესრიგის დაცვა და კანონმდებლობით გათვალისწინებული სხვა შემთხვევები.
2. აუდიომონიტორინგი ხორციელდება მხოლოდ სასამართლოს შიდა რეგულაციებისა და მოქმედი კანონმდებლობის (საქართველოს ორგანული კანონი საერთო სასამართლოების შესახებ, ადმინისტრაციული საპროცესო კოდექსი და სხვა შესაბამისი აქტები) შესაბამისად, საქართველოს კანონმდებლობით პირდაპირ გათვალისწინებულ შემთხვევებში.
3. აუდიომონიტორინგის განხორციელება დასაშვებია:
 - ა) მონაცემთა სუბიექტის თანხმობით;
 - ბ) საოქმო ჩანაწერის საწარმოებლად;
 - გ) დამუშავებისთვის პასუხისმგებელი პირის მნიშვნელოვანი ლეგიტიმური ინტერესის დასაცავად, თუ განსაზღვრულია სათანადო და კონკრეტული ღონისძიებები მონაცემთა სუბიექტის უფლებებისა და ინტერესების დასაცავად;
 - დ) საქართველოს კანონმდებლობით პირდაპირ გათვალისწინებულ სხვა შემთხვევებში.
4. აუდიოჩანაწერები ინახება არაუმეტეს თხუთმეტი დღის განმავლობაში საქართველოს იუსტიციის უმაღლეს საბჭოსთან არსებული სსიპ „საერთო სასამართლოების დეპარტამენტის“ და სენაკის რაიონული (მათ შორის აბაშისა და მარტვილის მაგისტრატი) სასამართლოს შენობაში განთავსებულ სერვერებზე, რის შემდეგაც ისინი ავტომატურად იშლება, გარდა იმ შემთხვევებისა, როდესაც არსებობს სამართლებრივი მოთხოვნა მათი შენახვისთვის.
5. აუდიოჩანაწერები დაცულია შესაბამისი უსაფრთხოების ზომებით, რათა თავიდან იქნას აცილებული მათი არაუფლებამოსილი წვდომა, შეცვლა ან განადგურება. ჩანაწერებზე წვდომა აქვს მხოლოდ უფლებამოსილ პირებს.
6. სასამართლოს მისაღებში განთავსებულია თვალსაჩინო გამაფრთხილებელი ნიშნები აუდიო მონიტორინგის მიმდინარეობის შესახებ.

მუხლი 19. პერსონალურ მონაცემთა დამუშავება შენობაში (სამუშაო ადგილზე) შესვლისა და გასვლის აღრიცხვის მიზნით

1. შენობაში შესვლისა და შენობიდან გასვლის აღრიცხვის მიზნით, სასამართლოს მოხელეთა მხრიდან შინაგანაწესის დაცვის ზედამხედველობის განსახორციელებლად, ავტომატური საშუალებებით ხორციელდება თანამშრომელთა ისეთი მონაცემების დამუშავება, როგორიცაა სახელი, გვარი, პოზიცია, შენობაში შესვლისა და გასვლის ზუსტი დრო, ჟურნალზე ხელის მოწერით.
2. ამ მუხლის პირველი პუნქტით გათვალისწინებულ მონაცემთა შენახვის ვადა არ უნდა აღემატებოდეს მათი ჩაწერის დღიდან ერთ წელს, რომლის გასვლის შემდეგაც ეს მონაცემები მოწყობილობიდან ნადგურდება.
3. ხელმოწერილი ჟურნალები უნდა ინახებოდეს სასამართლოს მენეჯერთან, რომელიც ვადის გასვლის შემდგომ შესაბამისი აქტის საფუძველზე მოახდენს მის განადგურებას.

მუხლი 20. მანდატურის სამსახური

1. მანდატურის სამსახური ვალდებულია, დაამუშავოს პირის პერსონალური მონაცემები საქართველოს კანონმდებლობის საფუძველზე, სენაკის რაიონული (მათ შორის აბაშისა და მარტვილის მაგისტრატი) სასამართლოს უსაფრთხოების, აგრეთვე, შენობის შიდა და გარე პერიმეტრისა და შენობაში შესვლისა და გასვლის კონტროლის ლეგიტიმური მიზნების მისაღწევად.
2. სენაკის რაიონული (მათ შორის აბაშისა და მარტვილის მაგისტრატი) სასამართლოს ადმინისტრაციულ ნაწილში მოქალაქის დაშვება ხორციელდება მანდატურის სამსახურის უფროსის მიერ, ელექტრონული პროგრამის მეშვეობით (როდესაც დაინერგება სასამართლოში ელექტრონული პროგრამა), ხოლო არაელექტრონული საშუალო სისტემის დროს სპეციალური ჟურნალში რეგისტრაციით, სადა აღრიცხული უნდა იყოს პირის სახელი, გვარი, პირადი ნომერი, შენობაში შემოსვლისა და გასვლის დროს, რომლის რეგისტრაციაზე ზედამხედველობა დაევალოს მანდატურის სამსახურის უფროსს, ხოლო ჟურნალის რეგისტრაცია აწარმოოს მორიგე მანდატურმა.
3. ამ მუხლის მე-2 პუნქტით გათვალისწინებული არაავტომატური ფორმის რეესტრი ინახება ერთი წლის ვადით, რომლის შემდეგაც იგი ნადგურდება კანონმდებლობით დადგენილი წესის შესაბამისად. ისინი ინახება საამისოდ გამოყოფილ, დაცულ ადგილას და მათზე წვდომა მხოლოდ მენეჯერს, მანდატურის სამსახურის უფროსს და უფლებამოსილ პირს აქვს.
4. სენაკის რაიონული (მათ შორის აბაშისა და მარტვილის მაგისტრატი) სასამართლოს მანდატურის სამსახური უზრუნველყოფს სასამართლოს შენობაში შესვლის მსურველი პირის რეგისტრირებული ცეცხლსასროლი იარაღის დროებით შენახვას პირის სასამართლოს შენობიდან გასვლის მომენტამდე და აწარმოებს იარაღის დაბრუნების დამადასტურებელი ხელწერილების არაავტომატურ რეესტრს, რომელშიც აისახება ცეცხლსასროლი იარაღის მფლობელის სახელი და გვარი, იარაღის სერია, სამსახურებრივი მოწმობის ნომერი/ცეცხლსასროლი იარაღის ტარების ნებართვის ნომერი, ხელწერილის გაფორმების თარიღი. რეესტრი ინახება მანდატურის სამსახურის უფროსთან და მასზე ვრცელდება ამ მუხლის მე-3 პუნქტით განსაზღვრული მონაცემთა უსაფრთხოებისთვის განკუთვნილი ორგანიზაციულ-ტექნიკური ზომები.

მუხლი 21. პერსონალურ მონაცემთა დამუშავება საჯარო ინფორმაციის გაცემისას

1. ინფორმაციის თავისუფლების უზრუნველყოფის მიზნით, საჯარო ინფორმაციის გაცემის პროცესში, სენაკის რაიონულმა სასამართლომ, პირის პერსონალურ მონაცემთა ამსახველი იმ ინფორმაციის გარდა, რომელიც მომდინარეობს საჯარო ინფორმაციის მოთხოვნის (მათ შორის, საჯარო ინფორმაციის გაცემაზე სენაკის რაიონულ სასამართლოს უარის თაობაზე წარმოდგენილი ადმინისტრაციული საჩივრის) შინაარსის ინდივიდუალური თავისებურებებიდან, შესაძლებელია დაამუშავოს პირის შესახებ ისეთი ინფორმაცია, როგორიცაა სახელი, გვარი (დასახელება), პირადი ნომერი (რეგისტრაციის ნომერი), ელ.ფოსტა, მობილურის ნომერი ან/და პირის ხელმოწერა.
2. ამ მუხლის 1-ლი პუნქტით გათვალისწინებული დამუშავების პროცესის ორგანიზების მიზნით, შექმნილია ნახევრად ავტომატური ფორმის ინდივიდუალური რეესტრი, რომელშიც აღირიცხება საჯარო ინფორმაციის გაცემასთან დაკავშირებით (მათ შორის, საჯარო ინფორმაციის გაცემაზე სენაკის რაიონული (მათ შორის აბაშისა და მარტვილის მაგისტრატი) სასამართლოს უარის თაობაზე წარმოდგენილ ადმინისტრაციულ საჩივრებთან დაკავშირებული) არსებულ პერსონალურ მონაცემთა ამსახველი ისეთი ინფორმაცია, რომელიც არ უკავშირდება სასამართლოში სამართალწარმოების მიზნით მონაცემთა დამუშავებას.
3. ამ მუხლის მე-2 პუნქტით გათვალისწინებული ნახევრად ავტომატური ფორმის ინდივიდუალური რეესტრი ინახება ერთი წლის ვადით, შესაბამისი საჭიროების არსებობის შემთხვევაში კი, მისი შენახვა შესაძლებელია გაგრძელდეს კიდევ დამატებით ერთი წლის ვადით. ამ ვადის გასვლის შემდეგ იგი გადაეცემა ... სასამართლოს არქივს, რომელიც ამ ინფორმაციას ინახავს საჯარო ინფორმაციაზე გაცემული პასუხების შენახვისთვის

განსაზღვრული ნომენკლატურით გათვალისწინებული ვადით, რომლის შემდეგაც იგი ნადგურდება საქართველოს კანონმდებლობით დადგენილი წესის შესაბამისად.

4. საჯარო ინფორმაციის გაცემასთან დაკავშირებით (მათ შორის, ადმინისტრაციული საჩივრები) არსებულ პერსონალურ მონაცემთა ამსახველი ინფორმაციის შენახვა ხდება შესაბამისი ორგანიზაციულ-ტექნიკური ზომებითა და პროგრამული უზრუნველყოფით აღჭურვილ მატერიალურ და ელექტრონულ ფაილურ სისტემაში, საამისოდ გამოყოფილ, დაცულ ადგილას და მათზე წვდომა მხოლოდ საჯარო ინფორმაციის გაცემაზე უფლებამოსილ პირს, ხოლო შემდგომ, არქივის შესაბამის თანამშრომლებს აქვთ.

მუხლი 22. სასამართლო კანცელარია (სტატისტიკის წარმოება)

1. სენაკის რაიონული (მათ შორის აბაშისა და მარტვილის მაგისტრატი) სასამართლოს სტრუქტურაში მოქალაქეთა მომსახურების და მათთან კომუნიკაციის პროცესის გამართულ ფუნქციონირებას და ეფექტიან მომსახურებას უზრუნველყოფს სასამართლოს კანცელარია - კანცელარიის უფროსი, სპეციალისტი და მაგისტრატი სასამართლოს სპეციალისტები, რომელიც ამუშავებენ სასამართლოს სტატისტიკურ მონაცემებს, სასამართლოში ცაკლე შტატი სტატისტიკოსის გამოყოფილი არ არის.
2. სასამართლოს კანცელარიის უფროსი, სპეციალისტი და მაგისტრატი სასამართლოს სპეციალისტები, საკუთარი ფუნქციების სრულყოფილად შესასრულებლად, პირის პერსონალურ მონაცემებს ამუშავებს ნახევრად ავტომატური ან/და არაავტომატური საშუალებებით, მათ შორის, სასამართლოში მატერიალური ან/და ელექტრონული სახით შემოსული კორესპონდენციების მიღება-რეგისტრაციის უზრუნველყოფის, საჯარო ინფორმაციის გაცემის მოთხოვნით შემოსული განცხადებების და სხვა ტიპის კორესპონდენციის აღრიცხვისა და გადამისამართების, აგრეთვე, შემოსული დოკუმენტაციის შესაბამისი სტრუქტურული ერთეულისათვის დროულად გადაცემის მიზნით.
3. ამ მუხლის პირველი და მეორე პუნქტებით გათვალისწინებული დამუშავების პროცესის გამართული ფუნქციონირების უზრუნველსაყოფად, ფაილური სისტემის სახით შექმნილია ნახევრად ავტომატური და არაავტომატური ფორმის სპეციალური რეესტრი მონაცემთა დამუშავების იმგვარი პროცესის აღსარიცხად, რომელიც არ უკავშირდება სასამართლოში სამართალწარმოების მიზნით მონაცემთა დამუშავებას ან წარმოადგენს განცხადებას საჯარო ინფორმაციის გაცემის მოთხოვნის თაობაზე.
4. პერსონალურ მონაცემთა სასამართლოში სამართალწარმოების მიზნით დამუშავების სტატუსის მინიჭების საკითხის განხილვისას წამოჭრილი უთანხმოების შემთხვევაში, პერსონალურ მონაცემთა დაცვის ოფიცერი ახდენს სასამართლოს კანცელარიის თანამშრომელთა ინფორმირებას, მათთვის კონსულტაციისა და მეთოდური დახმარების გაწევას, რომელსაც სარეკომენდაციო ხასიათი აქვს.
5. სასამართლოს კანცელარიის თანამშრომლები, ამ მუხლის მე-3 პუნქტით გათვალისწინებულ სპეციალურ რეესტრში, არაავტომატური ფორმით აღრიცხავს ისეთ პერსონალურ ინფორმაციას, როგორიცაა განმცხადებლის ვინაობა, განცხადების შემოსვლის თარიღი, განცხადების მიღების საშუალება და განცხადების ობიექტის ზოგადი აღწერილობა.
6. სასამართლოში მატერიალური სახით შემოსული კორესპონდენციის მიღება-რეგისტრაციის უზრუნველყოფისას, ამ მუხლის მე-4 პუნქტით განსაზღვრულ დამუშავებასთან ერთად, დამატებით ხორციელდება პირადობის დამადასტურებელი მოწმობის ქსეროასლის გადაღება, ელექტრონული სახით კორესპონდენციის მიღების შემთხვევაში კი, ადგილი აქვს სტრუქტურიზებული, საზოგადოდ გამოყენებადი და მანქანურად წაკითხვადი ფორმატით მიღებული მონაცემების აღრიცხვას ნახევრად ავტომატური რეესტრის ფაილურ სისტემაში.
7. ამ მუხლის მე-4 პუნქტი ვრცელდება საჯარო ინფორმაციის გაცემის მოთხოვნით შემოსული და სხვა ტიპის განცხადებების აღრიცხვის და გადამისამართების პროცესში მიმდინარე მონაცემთა დამუშავებზე, იმ თავისებურებების გათვალისწინებით, რაც დადგენილია ამ დებულების 22-ე მუხლით.

8. ამ მუხლის მე-5 და მე-6 პუნქტებით გათვალისწინებული ნახევრად ავტომატური და არაავტომატური ფორმის სპეციალური ინდექსირებული რეესტრი ინახება ერთი წლის ვადით, შესაბამისი საჭიროების არსებობის შემთხვევაში კი, მისი შენახვა შესაძლებელია გაგრძელდეს კიდევ დამატებით ერთი წლის ვადით. ამ ვადის გასვლის შემდეგ იგი ნადგურდება საქართველოს კანონმდებლობით დადგენილი წესის შესაბამისად.
9. ელექტრონული სახით შემოსული კორესპონდენციის მიმღებ სისტემაში ასახული ინფორმაცია ინახება ერთი წლის ვადით, რომლის შემდეგაც იგი ნადგურდება.
10. სასამართლოს კანცელარიის სამსახურის ფუნქციონირების პროცესში დამუშავებულ პერსონალურ მონაცემთა ამსახველ ინფორმაციაზე წვდომა მხოლოდ ამავე სტრუქტურული ერთეულის უფლებამოსილ მოხელეებს აქვთ და ასეთ მონაცემთა შენახვა ხორციელდება:
 - ა) შესაბამისი ორგანიზაციულ-ტექნიკური ზომებით, აგრეთვე, პროგრამული უზრუნველყოფით აღჭურვილ მატერიალურ და ელექტრონულ ფაილურ სისტემაში;
 - ბ) დაცულ ადგილას განთავსებულ ელექტრონულ მოწყობილობაში, ინფორმაციული ტექნოლოგიების სპეციალისტის მიერ სასამართლოს კანცელარიისა და სტატისტიკის სამსახურის უფლებამოსილი მოხელეების წვდომის უზრუნველყოფით (სისტემაში შესასვლელად აუცილებელია მომხმარებელი და პაროლი);
 - გ) კონკრეტული სამსახურებრივი კომპიუტერის IP მისამართის იმ სერვერებთან კავშირი, რომლითაც ელექტრონული სახით შემოსული კორესპონდენციის მიმღებ სისტემაში ხდება უფლებამოსილ მოხელეთა ზოგადი დაშვება, უზრუნველყოფილია სსიპ საერთო სასამართლოების დეპარტამენტის ინფორმაციული ტექნოლოგიების საშუალებებით. სსიპ საერთო სასამართლოების დეპარტამენტის უფლებამოსილი პირი ახდენს იმ მომხმარებლის/IP მისამართის იდენტიფიცირებას და შენახვას („ლოგირება“), რომლითაც ხორციელდება სისტემაში შესვლა. აღნიშნული პროცესის და შესაბამისი სერვერების ტექნიკურ-ორგანიზაციულ უსაფრთხოებას უზრუნველყოფს სსიპ საერთო სასამართლოების დეპარტამენტი.
11. სასამართლო კანცელარიისა და სტატისტიკის სამსახურის მიზანია ასევე სასამართლოში სამართალწარმოების დასრულებამდე ან/და დასრულების შემდგომ, საქმეთა და კორესპონდენციის ბრუნვის პროცესის კოორდინაციის, წარმართვის, საარქივო, სტატისტიკური, საფოსტო და საკურიერო მომსახურების უზრუნველყოფა.
12. კანცელარია ამ მუხლის მე-11 პუნქტით განსაზღვრული საქმიანობის განხორციელების პროცესში პირის პერსონალურ მონაცემებს ამუშავებს ავტომატური ან/და ნახევრად ავტომატური საშუალებებით და საქმიანობის საგნობრივი სფეროების შესაბამისად, ქმნის ფაილური სისტემის შემცველ მონაცემთა რეესტრებს ან თავად ინტეგრირდება ასეთ სისტემაში.
13. საფოსტო მომსახურების ფარგლებში, კანცელარია ახდენს შესაბამისი სტრუქტურული ერთეულების მიერ მომზადებული გზავნილების/კონვერტების იმგვარი მონაცემების საფოსტო მომსახურების კომპანიის ელექტრონულ პროგრამაში შეტანას ან/და დარეგისტრირებას და საამისოდ განსაზღვრულ რეესტრებზე ხელმოწერის შემდეგ ფოსტის წარმომადგენლებისათვის ადრესატებისთვის გადაცემის მიზნით ჩაბარებას, როგორცაა ადრესატი (მაგ., სახელი, გვარი, პირადი ნომერი, ელ.ფოსტა, მისამართი, მობილურის ნომერი), გამგზავნი პირის დასახელება და თარიღი. შესაბამის პორტალზე ხორციელდება მხოლოდ გამგზავნი სუბიექტისა და რეგისტრატორის დასახელების იდენტიფიცირება. დამუშავებული რეესტრების შენახვა ხდება საფოსტო მომსახურების სივრცეში, შესაბამისად გამოყოფილ ადგილას და 2 წლის შემდეგ არქივისათვის გადაუცემლად ექვემდებარება განადგურებას.
14. ამ მუხლის მე-13 პუნქტით განსაზღვრული საფოსტო მომსახურების კომპანიის ელექტრონულ პროგრამაში დარეგისტრირებული გზავნილების ამსახველი რეესტრები ექვემდებარება დახარისხებას, რომელიც შეიცავს შესაბამისი პროგრამული უზრუნველყოფის მეშვეობით საფოსტო მომსახურების კომპანიის მიერ მინიჭებულ შტრიხ კოდს, ადრესატსა

და გაგზავნის ადგილს, კორესპოდენციის ნომერსა და უფლებამოსილი მოხელის შესაბამის სახელსა და გვარს. ამასთანავე, ყოველგვარი გაუგებრობის გამორიცხვის მიზნით, რეესტრის ასლები ინახება კანცელარიისა და საფოსტო მომსახურების კომპანიის ელექტრონულ პროგრამაში. დამუშავებული რეესტრების შენახვა ხდება საფოსტო მომსახურების სივრცეში, შესაბამისად გამოყოფილ ადგილას და 2 წლის შემდეგ არქივისათვის გადაუცემლად ექვემდებარება განადგურებას.

15. ამ მუხლის მე-13 პუნქტით განსაზღვრული საფოსტო მომსახურების კომპანიის ელექტრონულ პროგრამაში დარეგისტრირებული ჩაბარებული და სხვადასხვა მიზეზის გამო უკან დაბრუნებული გზავნილების ამსახველი რეესტრები ექვემდებარება დახარისხებას, საფოსტო მომსახურების სივრცეში გამოყოფილ ადგილას დროებით განთავსება/შენახვას და 2 წლის შემდეგ არქივისათვის გადაუცემლად განადგურებას.
16. სტრუქტურული ერთეულების მიერ მომზადებული განსაზღვრული გზავნილების/კონვერტების პერსონალური მონაცემები (მაგ., ადრესატი, გამგზავნი პირის დასახელება და თარიღი ან/და უფლებამოსილი თანამშრომლის დასახელება) შეიტანება ფაილური სისტემის ელექტრონულ საცავში და შესაბამის რეესტრზე ხელმოწერის შემდეგ, საჭიროების შემთხვევაში, ხორციელდება კურიერებისათვის გადაცემა შესაბამისი ადრესატებისთვის გზავნილების გადაცემის მიზნით. დამუშავებული რეესტრების შენახვა ხდება საფოსტო მომსახურების სივრცეში, შესაბამისად გამოყოფილ ადგილას და ორი წლის შემდეგ არქივისათვის გადაუცემლად ექვემდებარება განადგურებას.
17. ამ მუხლის მე-16 პუნქტით განსაზღვრული კურიერების მიერ ჩაბარებული გზავნილების ამსახველი რეესტრები გადაეცემა უფლებამოსილ თანამშრომელს მისი დახარისხების, აგრეთვე, საფოსტო მომსახურების სივრცეში გამოყოფილ ადგილას დროებით განთავსება/შენახვის მიზნით. ამ პუნქტით გათვალისწინებული რეესტრები ნადგურდება ორი წლის ვადაში არქივისათვის გადაუცემლად.
18. საქმისწარმოების განხორციელების უზრუნველყოფის მიზნით, სენაკის რაიონული (მათ შორის აბაშისა და მარტვილის მაგისტრატი) სასამართლოდან გასული კორესპოდენციის ამსახველი რეესტრის წარმოებისას მუშავდება ისეთი პერსონალური მონაცემები, როგორიცაა ადრესატის და გამგზავნი პირის დასახელება და თარიღი. მონაცემთა უსაფრთხოების ორგანიზაციულ-ტექნიკური ზომების გათვალისწინებით, გასაგზავნი წერილის დალუქული კონვერტის ასლზე დაიტანება მხოლოდ უფლებამოსილი თანამშრომლის ხელმოწერა და თარიღის მინიჭება მისთვის ჩაბარების უზრუნველყოფის მიზნით.
19. კორესპოდენციის შინაარსზე არამართლზომიერი წვდომის გამორიცხვის მიზნით, ნებისმიერი ისეთი ინფორმაცია, რომელიც აუცილებელია დოკუმენტბრუნვის გამართული განხორციელების მიზნით, თუმცა, აუცილებლად საჭიროებს წერილის შინაარსის გაცნობას, შეთანხმდება შესაბამისი სტრუქტურული ერთეულის უფლებამოსილ თანამშრომელთან. დამუშავებული რეესტრების შენახვა ხდება საფოსტო მომსახურების სივრცეში, შესაბამისად გამოყოფილ ადგილას და 2 წლის შემდეგ არქივისათვის გადაუცემლად ექვემდებარება განადგურებას.
20. საარქივო საქმიანობის მიზანია შესაბამისი სტრუქტურული ერთეულების მიერ საქმისწარმოებით დამთავრებული/დასრულებული დოკუმენტების მიღებისა და აღრიცხვის წარმოება, ნომენკლატურით დადგენილი წესის შესაბამისად.
21. სენაკის რაიონული (მათ შორის აბაშისა და მარტვილის მაგისტრატი) სასამართლოს სტატისტიკის სექტორი ახორციელებს სასამართლოში შემოსული და განხილული საქმეების/საჩივრების შესახებ ინფორმაციის სტატისტიკურ ფორმებში აღრიცხვას და სტატისტიკის წარმოებას საქართველოს იუსტიციის უმაღლესი საბჭოს მიერ და საერთაშორისო ხელშეკრულებებითა და შეთანხმებებით ნაკისრი ვალდებულებების ფარგლებში შექმნილი სტატისტიკური ფორმების მიხედვით. აღნიშნულ პროცესში პერსონალური მონაცემების დამუშავება სტატისტიკური მიზნებისთვის, არ მიიჩნევა

მონაცემთა დამუშავების თავდაპირველ მიზანთან შეუთავსებლად, „პერსონალურ მონაცემთა დაცვის შესახებ“ საქართველოს კანონის მე-4 მუხლის მე-6 პუნქტის შესაბამისად.

22. სენაკის რაიონული (მათ შორის აბაშისა და მარტვილის მაგისტრატი) სასამართლოში ფუნქციონირებს საქმის გასაცნობი სივრცე, რომელშიც საქმის მასალებთან წვდომის საფუძველია პირის განცხადება. პროცესის ადმინისტრირების მიზნით, სენაკის რაიონული (მათ შორის აბაშისა და მარტვილის მაგისტრატი) სასამართლოს უფლებამოსილი თანამშრომელი არაავტომატურ რეესტრში აღრიცხავს საქმის მასალების გაცნობის მოთხოვნით შემოსული განცხადების ნომერს და ავტორის სახელს და გვარს. რეესტრი ინახება ერთი წლის ვადით.

მუხლი 23. სამეურნეო მიმართულების კოორდინაცია

1. სამეურნეო მიმართულების კოორდინატორი და წამყვანი სპეციალისტი (სამეურნეო საკითხებში) უზრუნველყოფენ სასამართლოსთვის გამოყოფილი სამეურნეო რესურსის და მომსახურების ეფექტიანი ადმინისტრირების ხელშეწყობა.
2. ამ მუხლის პირველი პუნქტით გათვალისწინებული პროცესის გამართული ფუნქციონირების უზრუნველსაყოფად, ფაილური სისტემის სახით შექმნილია ნახევრად-ავტომატური და არაავტომატური ფორმის რეესტრები საქმიანობის საგნობრივი სფეროების შესაბამისად მონაცემთა დამუშავების იმგვარი პროცესის აღსარიცხად, რომელიც არ შედის სასამართლოში სამართალწარმოების მიზნით მონაცემთა დამუშავების პროცესში, სამეურნეოს დახმარების პროგრამაში “intranet” გვერდის მეშვეობით.
3. სამეურნეო მიმართულებაზე პასუხისმგებელი თანამშრომლები ახორციელებენ მონაცემთა იმგვარი კატეგორიების დამუშავებას, როგორიცაა - სახელი/გვარი, პირადი ნომერი, მობილურის ნომერი, ელ. ფოსტა, საბანკო ანგარიშის მაიდენტიფიცირებელი მონაცემები, ხელმოწერა - შემდეგი ფუნქციების განხორციელების უზრუნველსაყოფად:
 - ა) სასამართლოს თანამშრომელთათვის მცირეფასიანი ნივთების გადაცემა (რეესტრში მიეთითება თანამშრომლის სახელი და გვარი);
 - ბ) თანამშრომელთათვის ძირითადი საშუალებების სარგებლობაში გადაცემა (მიეთითება შენობის შესაბამისი ოთახის ნომერი);
 - გ) თანამშრომელთათვის პორტატული კომპიუტერის დროებით სარგებლობაში გადაცემა (მიეთითება თანამშრომლის სახელი და გვარი, ხელმოწერა);
 - დ) სასამართლოსთვის გაწეულ მომსახურებასთან დაკავშირებული ადმინისტრაციული საკითხების მართვა (იწარმოება გაწეული მომსახურების მიღება-ჩაბარების აქტების რეესტრი, შესაბამისი რეკვიზიტების მითითებით);
 - ე) სენაკის რაიონული (მათ შორის აბაშისა და მარტვილის მაგისტრატი) სასამართლოში ქსეროასლის გადაღების და ასევე, გამოთხოვილი საჯარო ინფორმაციის ასლის სახით მიწოდების შემთხვევაში „საჯარო ინფორმაციის ასლის გადაღების მოსაკრებლის შესახებ“ საქართველოს კანონის შესაბამისად, გამომთხოვი პირისთვის დაკისრებული მოსაკრებლის რეესტრის წარმოება და სახელმწიფო ხაზინაში შესაბამისი შენატანების განხორციელება (მოთხოვნის ავტორის სახელი, გვარი/დასახელება).
4. ამ მუხლის მე-3 პუნქტით განსაზღვრული პერსონალური მონაცემები ინახება საქართველოს კანონმდებლობით ან სასამართლოს ნომენკლატურით დადგენილი ვადის განმავლობაში.
5. ამ მუხლით გათვალისწინებული პერსონალური მონაცემების შენახვა ხორციელდება შესაბამისი (ფიზიკური ან/და სხვა) ორგანიზაციულ-ტექნიკური ზომებით და პროგრამული უზრუნველყოფით აღჭურვილ მატერიალურ ან/და ელექტრონულ სისტემაში, საამისოდ გამოყოფილ, დაცულ ადგილას და მათზე წვდომა მხოლოდ უფლებამოსილ თანამშრომელს აქვს.

მუხლი 24. ადამიანური რესურსების მართვისა და სამართლებრივი უზრუნველყოფის სამსახური

1. სენაკის რაიონულ (მათ შორის აბაშისა და მარტვილის მაგისტრატ) სასამართლოში ადამიანური რესურსების სამსახური არ არსებობს, აღნიშნული ფუნქციის შესრულება

აკისრია სასამართლოს მენეჯერს, რომელიც უზრუნველყოფს სასამართლოში ადამიანური რესურსების მართვის, რომლის მიზანია სასამართლოს აპარატის ადამიანური რესურსების მართვა, მოხელეთა მხრიდან შინაგანაწესის დაცვის კონტროლი, მოხელეთა შეფასებისა და გამოსაცდელი ვადის მართვა, პროფესიული საჭიროებების განსაზღვრისა და შესაბამისი ღონისძიებების დაგეგმვა-განხორციელება, კონკურსის პროცესის ორგანიზება, საკადრო აღრიცხვის, საკადრო საკითხებთან დაკავშირებული და სხვა ბრძანებების, ასევე, სხვა სახის დოკუმენტაციის წარმოება.

2. ადამიანური რესურსების მართვასთან დაკავშირებით სასამართლოს მენეჯერი ამ მუხლის 1-ლი პუნქტით განსაზღვრული ლეგიტიმური მიზნების მიღწევის პროცესში, პერსონალურ მონაცემებს ამუშავებს ავტომატური ან/და ნახევრად ავტომატური საშუალებებით და საკუთარი ფუნქციების შესაბამისად, ქმნის ფაილური სისტემის შემცველ მონაცემთა რეესტრებს ან თავად ინტეგრირდება ასეთ სისტემაში.
3. სასამართლოს მოხელეთა და შრომითი ხელშეკრულებით დასაქმებულ პირთა პირადი საქმეების წარმოებისას ხდება პირის შესახებ პერსონალური მონაცემების, კონკრეტულ პერსონალურ მონაცემთა შემცველი ისეთი ინფორმაციის ან მონაცემთა ისეთი კატეგორიების დამუშავება, როგორიცაა მატერიალური და ელექტრონული ფორმით არსებული პირადი საქმის დოკუმენტები: პირადობის მოწმობა, დიპლომი, C/V (მისამართი, საკონტაქტო ინფორმაცია, ელექტრონული ფოსტა), ფოტოსურათი, კადრების აღრიცხვის ფურცელი, დანიშვნის, გადაადგილების, გათავისუფლების, დისციპლინური პასუხისმგებლობის, წახალისების შესახებ ბრძანებები, ინფორმაცია ანაზღაურების შესახებ, ნასამართლობის შესახებ ცნობა, ნარკოლოგიური შემოწმების შესახებ ცნობა, ცნობები სამუშაოს შესახებ ან შრომის წიგნაკი, საავადმყოფო ფურცელი, ცნობა სამსახურიდან დისციპლინური გადაცდომის შესახებ (ასეთის არსებობის შემთხვევაში), სერტიფიკატები, საჯარო მოსამსახურის ფიცი, ხელწერილი შინაგანაწესის გაცნობის შესახებ და ინფორმაცია საბანკო ანგარიშის შესახებ.
4. საარქივე პირადი საქმეების წარმოებისას ხდება პირის შესახებ პერსონალური მონაცემების, კონკრეტულ პერსონალურ მონაცემთა შემცველი ისეთი ინფორმაციის ან მონაცემთა ისეთი კატეგორიების დამუშავება, როგორიცაა ჯანმრთელობის შესახებ ცნობა (ფორმა N100), ქონებრივი დეკლარაციის ჩაბარების ცნობები, ზოგადი ინფორმაცია ოჯახის წევრების შესახებ, შრომის წიგნაკები, ავტობიოგრაფია, მოხსენებითი ბარათები, დახასიათებები, ინფორმაცია ატესტაციის გავლის შესახებ.
5. ამ მუხლის მე-3 პუნქტით გათვალისწინებული მონაცემები ან/და ინფორმაცია, საქართველოს კანონმდებლობით გათვალისწინებული უფლებამოსილებების განსახორციელებლად, საჭიროების შემთხვევაში, შესაძლებელია გადაეცეს სსიპ საერთო სასამართლოების დეპარტამენტს.
6. ამ მუხლის მე-3 და მე-4 პუნქტებით განსაზღვრული ინფორმაცია ან/და პერსონალური მონაცემი ინახება ნომენკლატურით გათვალისწინებული ვადით.
7. სტაჟიორთა და სასწავლო პრაქტიკის გამვლელ პირთა პირადი საქმეების წარმოებისას ხდება პირის შესახებ პერსონალური მონაცემების, კონკრეტულ პერსონალურ მონაცემთა შემცველი ისეთი ინფორმაციის ან მონაცემთა ისეთი კატეგორიების დამუშავება, როგორიცაა პირადობის მოწმობა, დიპლომი ან ცნობა სასწავლო დაწესებულებიდან, C/V (მისამართი, საკონტაქტო ინფორმაცია, ელექტრონული ფოსტა), პირის ფოტოსურათი, დანიშვნის, გათავისუფლების შესახებ ბრძანებები (ასეთის არსებობის შემთხვევაში), ინფორმაცია ანაზღაურების შესახებ (ასეთის არსებობის შემთხვევაში), ნასამართლობის შესახებ ცნობა, ნარკოლოგიური შემოწმების შესახებ ცნობა, ცნობები სამუშაოს შესახებ, სერტიფიკატები, მონაცემები საბანკო ანგარიშის შესახებ.
8. ამ მუხლის მე-7 პუნქტით გათვალისწინებული პირადი საქმეები ინახება სტაჟიორის ან სასწავლო პრაქტიკის გამვლელ პირთა მიერ სტაჟირების დასრულებიდან ხუთი წლის

განმავლობაში, რომლის შემდეგაც იგი ნადგურდება საქართველოს კანონმდებლობით დადგენილი წესით.

9. ადამიანური რესურსების მართვა და სამართლებრივი უზრუნველყოფა ინტეგრირებულია საჯარო სამსახურის ბიუროს სპეციალურ ელექტრონულ პორტალში, რომელშიც ხორციელდება ადამიანური რესურსების მართვის ავტომატიზებულ სისტემაში საშტატო ნუსხის საფუძველზე შემუშავებულ სტრუქტურაში დაქვემდებარებებისა და პოზიციური კავშირების ფიქსაცია და მიმდინარეობს პირადი საქმეების ელექტრონულად წარმოება, მათ შორის, სახელის, გვარის, პირადი ნომრის, მისამართის, მობილური ტელეფონის ნომრის, ელექტრონული ფოსტის, დანიშვნისა და დაწინაურების შესახებ ინფორმაციის მითითებით.
10. ადამიანური რესურსების მართვისა და სამართლებრივი უზრუნველყოფის მიზნით სასამართლოს მენეჯერი, ინფორმაციული ტექნოლოგიების სპეციალისტის დახმარებით, სენაკის რაიონული სასამართლოს ვებ-გვერდზე კომპეტენციას მიკუთვნებული მასალის გამოქვეყნება/განახლებისას, ახორციელებს პირის შესახებ ისეთი პერსონალური მონაცემების დამუშავებას როგორიცაა: ინფორმაცია ორგანიზაციის სტრუქტურის შესახებ ხელმძღვანელი და მმართველი თანამდებობის პირების მითითებით, აპარატის სამსახურებრივი საკონტაქტო მობილურის ნომრები და პროაქტიულად გამოსაქვეყნებელი სხვა სახის ინფორმაცია.
11. ადამიანური რესურსების მართვისა და სამართლებრივი უზრუნველყოფის კუთხით სასამართლოს მენეჯერი, თანამდებობის დასაკავებლად გამოცხადებული კონკურსების მართვის პროცესში, ახორციელებს საქართველოს კანონმდებლობით, აგრეთვე, ამ მუხლის მე-3 პუნქტით განსაზღვრული რელევანტური პერსონალური მონაცემების დამუშავებას, რომლის გაზიარებაც ხდება საჯარო სამსახურის ბიუროსთან და ინახება ნომენკლატურით გათვალისწინებული ვადის განმავლობაში. კონკურსის მასალები, აგრეთვე, გასაუბრების პროცესში პირის თანხმობით გაკეთებული აუდიოჩანაწერი, ნადგურდება თანამდებობის დასაკავებლად გამოცხადებულ კონკურსში კონკურსის მონაწილე კანდიდატისთვის საქართველოს კანონმდებლობით მინიჭებული გასაჩივრების ვადის გასვლის შემდეგ.
12. ადამიანური რესურსების მართვისა და სამართლებრივი უზრუნველყოფის კუთხით სასამართლოს მენეჯერი, სენაკის რაიონული (მათ შორის აბაშისა და მარტვილის მაგისტრატი) სასამართლოს ადმინისტრირების ფარგლებში გამოცემული ბრძანებები (მოხელეების დანიშვნის, სამსახურებრივი გადაადგილების ან გათავისუფლების, წახალისების, დისციპლინური პასუხისმგებლობის ღონისძიების გამოყენების, აპარატის მოხელეთა შვებულების ან მივლინების შესახებ ბრძანებები, საერთო ხასიათის ბრძანებები ან/და სხვა ორგანიზაციული ხასიათის ბრძანებები) შესაძლებელია შესატყვისი კონტექსტის გათვალისწინებით ინახებოდეს მატერიალური ან/და ელექტრონული ფორმით ფაილური სისტემის შესაბამის რეესტრებში.
13. სენაკის რაიონული (მათ შორის აბაშისა და მარტვილის მაგისტრატი) სასამართლოს ადმინისტრირების ფარგლებში გამოცემულ ბრძანებებზე წვდომა განისაზღვრება სამსახურებრივი იერარქიის, ფუნქციური ან/და კანონით გათვალისწინებული სხვაგვარი საჭიროების გათვალისწინებით და მათზე წვდომა შესაძლებელია ჰქონდეს მხოლოდ სასამართლოს თავმჯდომარეს, სასამართლოს მენეჯერს, აგრეთვე, შესაბამისი სტრუქტურული ერთეულის ხელმძღვანელს, კომპეტენციის ფარგლებში - სსიპ საერთო სასამართლოების დეპარტამენტს. მათი შენახვა და განადგურება ხდება ბრძანების სახეობის ან/და მოწესრიგების საგნის გათვალისწინებით, ნომენკლატურით დადგენილი წესის შესაბამისად.
14. ადამიანური რესურსების მართვის და სამართლებრივი უზრუნველყოფის კუთხით სენაკის რაიონული სასამართლოს მენეჯერი, ელექტრონული ან/და მატერიალური ფორმით, ახორციელებს შრომითი ხელშეკრულების საფუძველზე სასამართლოში მიღებული პირის შესახებ პერსონალურ მონაცემთა კატეგორიის შემცველი იმგვარი ინფორმაციის დამუშავებას როგორიცაა, სახელი, გვარი, მისამართი, პირადი ნომერი და მობილურის ნომერი. ამ ინფორმაციაზე პირდაპირი წვდომა აქვს სასამართლოს მენეჯერს, ამასთანავე,

გამარტივებული საჯარო კონკურსის გარეშე გაფორმებული შრომითი ხელშეკრულება ეგზავნება საჯარო სამსახურის ბიუროს და იგი ინახება ხუთი წლის ვადით მას შემდეგ, რაც მოხდება ამ პირის დაკავებული თანამდებობიდან გათავისუფლება.

15. ადამიანური რესურსების მართვისა და სამართლებრივი უზრუნველყოფის კუთხით სასამართლოს მენეჯერი, სამსახურის სტაჟის დამადასტურებელი ცნობის გაცემისას, ამუშავებს პირის შესახებ ისეთ პერსონალურ მონაცემებს, როგორიცაა სახელი, გვარი, პირადი ნომერი, დაკავებული პოზიციის, დასაქმების ხანგრძლივობისა და ანაზღაურების შესახებ ინფორმაცია, რომელსაც ენიჭება შესაბამისი სარეგისტრაციო ნომერი და იგზავნება დანიშნულებისამებრ.
16. ადამიანური რესურსების მართვისა და სამართლებრივი უზრუნველყოფის კუთხით სასამართლოს მენეჯერი, სხვადასხვა სახელმწიფო და კერძო დაწესებულებების, აგრეთვე მოქალაქეთა განცხადებებისა და წერილების მომზადებისას, პირის პერსონალურ მონაცემთა ამსახველი იმ ინფორმაციის გარდა, რომელიც გამომდინარეობს მოთხოვნის შინაარსის ინდივიდუალური თავისებურებებიდან, შესაძლებელია დაამუშავოს პირის შესახებ ისეთი ინფორმაცია, როგორიცაა სახელი, გვარი (დასახელება), პირადი ნომერი (რეგისტრაციის ნომერი), ელ.ფოსტა, მობილურის ნომერი ან/და პირის ხელმოწერა.
17. ამ მუხლის მე-16 პუნქტით გათვალისწინებული ინფორმაცია ინახება ერთი წლის ვადით, შესაბამისი საჭიროების არსებობის შემთხვევაში კი, მისი შენახვა შესაძლებელია გაგრძელდეს კიდევ დამატებით ერთი წლის ვადით. ამ ვადის გასვლის შემდეგ იგი გადაეცემა საქართველოს იუსტიციის უმაღლეს საბჭოსთან არსებული სსიპ საერთო სასამართლოების დეპარტამენტის არქივს, რომელიც ამ ინფორმაციას ინახავს ნომენკლატურით გათვალისწინებული ვადით, რომლის შემდეგაც იგი ნადგურდება საქართველოს კანონმდებლობით დადგენილი წესის შესაბამისად.
18. ადამიანური რესურსების მართვისა და სამართლებრივი უზრუნველყოფის კუთხით სასამართლოს მენეჯერი სასამართლოს შიდა ორგანიზაციული კომუნიკაციის გამართულად ფუნქციონირების მიზნით, ახორციელებს შიდა ქსელურ სისტემაში აპარატის თანამშრომელთა შესახებ ისეთი ინფორმაციის მუდმივ რეჟიმში მიწოდება/განახლებას, როგორიცაა აპარატის თანამშრომელთა საკონტაქტო ინფორმაცია და დაკავებული თანამდებობა.
19. ადამიანური რესურსების მართვისა და სამართლებრივი უზრუნველყოფის კუთხით სასამართლოს მენეჯერი, სენაკის რაიონული (მათ შორის აბაშისა და მარტვილის მაგისტრატი) სასამართლოს აპარატის თანამშრომლებისათვის სამსახურებრივი მოწმობების დამზადებისა და აღრიცხვისას, აგრეთვე, პროფესიული საჯარო მოხელეებისათვის, შრომითი ხელშეკრულებით დასაქმებული პირებისა და სტაჟიორებისათვის დროებითი საშვის მათთვის გადასაცემად დამზადებისას, ახორციელებს პირის შესახებ მონაცემთა ისეთი კატეგორიების დამუშავებას როგორიცაა პირის სახელი, გვარი, შესაბამისი პოზიცია, ფოტოსურათი და მინიჭებული ნომერი.
20. ადამიანური რესურსების მართვისა და სამართლებრივი უზრუნველყოფის კუთხით სასამართლოს მენეჯერი, დაზღვევის ხელშეკრულების დადების მიზნით, დაზღვევის მსურველ თანამშრომელთა თანხმობის საფუძველზე, ამუშავებს ისეთ პერსონალურ მონაცემებს, როგორიცაა სახელი, გვარი, პირადობის დამადასტურებელი დოკუმენტი და საკონტაქტო ინფორმაცია და მათ უგზავნის სსიპ საერთო სასამართლოების დეპარტამენტს, ამ დებულებით გათვალისწინებული ლეგიტიმური მიზნების მისაღწევად.
21. ამ მუხლით გათვალისწინებული პერსონალური მონაცემების შენახვა ხორციელდება შესაბამისი (ფიზიკური ან/და სხვა) ორგანიზაციულ-ტექნიკური ზომებით და პროგრამული უზრუნველყოფით აღჭურვილ მატერიალურ ან/და ელექტრონულ სისტემაში, საამისოდ გამოყოფილ, შესაბამის დაცულ ადგილას.

მუხლი 25. სენაკის რაიონული (მათ შორის აბაშისა და მარტვილის მაგისტრატი) სასამართლოში შექმნილი თემატური კომისიები და სამუშაო ჯგუფები

1. მოცემული დებულება ვრცელდება სენაკის რაიონულ (მათ შორის აბაშისა და მარტვილის მაგისტრატ) სასამართლოში შექმნილი თემატური კომისიების და სამუშაო ჯგუფების საქმიანობის ფარგლებში პერსონალურ მონაცემთა დამუშავებაზე.
2. კომისიის ან სამუშაო ჯგუფის საქმიანობის ფარგლებში მონაცემების დამუშავების ლეგიტიმური მიზანი და მონაცემთა შენახვის ვადა განსაზღვრულია საქართველოს კანონმდებლობით ან/და შესაბამისი კანონქვემდებარე აქტით.

მუხლი 26. სენაკის რაიონული სასამართლოს ვებგვერდი

1. სენაკის რაიონულ სასამართლოს აქვს ვებ-გვერდი, რომელიც ფუნქციონირებს საქართველოს იუსტიციის უმაღლესი საბჭოს ტექნიკურ-ორგანიზაციული მხარდაჭერის საფუძველზე.
2. პერსონალურ მონაცემთა უსაფრთხოების ტექნიკურ და ორგანიზაციულ ზომებთან შესაბამისობას - მონაცემთა დაკარგვის, უკანონო ან/და არასწორი გამოყენებისა და არაუფლებამოსილ პირთა წვდომის გამორიცხვის მიზნით - უზრუნველყოფს საქართველოს იუსტიციის უმაღლესი საბჭოს სტრუქტურული ერთეულები .
3. ამ მონაცემებზე სენაკის რაიონული სასამართლოს უფლებამოსილი მოხელეების წვდომა განისაზღვრება მხოლოდ მათი ფუნქციური საჭიროების შესაბამისად, ხოლო, მესამე პირთათვის მათი გამჟღავნება დასაშვებია მხოლოდ საქართველოს კანონმდებლობით გათვალისწინებულ შემთხვევებში.

თავი VI

დასკვნითი დებულებები

მუხლი 27. დებულების ამოქმედება

1. ეს დებულება ამოქმედდეს 2024 წლის 01 მარტიდან.
2. სენაკის რაიონული სასამართლოს მიერ პერსონალურ მონაცემთა დამუშავების პროცესში „პერსონალურ მონაცემთა დაცვის შესახებ“ საქართველოს კანონს უკუძალა არ აქვს.
3. ამ დებულების მე-16, მე-17 და 1ე-18 მუხლები ამოქმედდეს 2024 წლის 01 ივნისიდან.

მუხლი 28. „პერსონალურ მონაცემთა დაცვის შესახებ“ საქართველოს კანონით გათვალისწინებული გამონაკლისები

1. სენაკის რაიონული (მათ შორის აბაშისა და მარტვილის მაგისტრატი) სასამართლო თავისუფლდება:
 - ა) „პერსონალურ მონაცემთა დაცვის შესახებ“ საქართველოს კანონის მე-10 მუხლის მე-9 პუნქტით გათვალისწინებული ვალდებულებისგან იმ გამაფრთხილებელ ნიშნებთან მიმართებით, რომლებიც სენაკის რაიონულ (მათ შორის აბაშისა და მარტვილის მაგისტრატ) სასამართლოში 2024 წლის 1 მარტამდე განთავსდა.
 - ბ) „პერსონალურ მონაცემთა დაცვის შესახებ“ საქართველოს კანონის მე-11 მუხლის მე-4 პუნქტით გათვალისწინებული ვალდებულებისგან იმ გამაფრთხილებელ ნიშნებთან მიმართებით, რომლებიც სენაკის რაიონულ (მათ შორის აბაშისა და მარტვილის მაგისტრატ) სასამართლოში 2024 წლის 1 მარტამდე განთავსდა.
 - გ) „პერსონალურ მონაცემთა დაცვის შესახებ“ საქართველოს კანონის 26-ე მუხლით გათვალისწინებული ვალდებულების შესრულებისგან იმ პროგრამულ უზრუნველყოფასთან მიმართებით, რომელიც გამოიყენება მონაცემთა დამუშავებისთვის და შეიქმნა 2024 წლის 1 მარტამდე.
4. ამ მუხლის 1-ლი პუნქტის „გ“ ქვეპუნქტიდან გამონაკლისს წარმოადგენს შემთხვევა როდესაც 2024 წლის 1 მარტის შემდეგ ეს პროგრამული უზრუნველყოფა მნიშვნელოვნად განახლდა და ასეთი ვალდებულების შესრულება სენაკის რაიონული (მათ შორის აბაშისა და მარტვილის მაგისტრატი) სასამართლოს არაპროპორციულ და გადამეტებულ ტვირთს არ აკისრებს.

5. ღია სასამართლო სხდომის შედეგად მიღებული სასამართლო აქტის გაცემასთან და გამოქვეყნებასთან დაკავშირებული საკითხები განისაზღვრება „საერთო სასამართლოების შესახებ“ საქართველოს ორგანული კანონით დადგენილი წესით.

მუხლი 29. „პერსონალურ მონაცემთა დაცვის შესახებ“ საქართველოს კანონით გათვალისწინებული მოთხოვნები, რომლებიც არ ვრცელდება სენაკის რაიონული (მათ შორის აბაშისა და მარტვილის მაგისტრატი) სასამართლოს მიმართ

1. სენაკის რაიონული (მათ შორის აბაშისა და მარტვილის მაგისტრატი) სასამართლოს საქმიანობის თავისებურებების გათვალისწინებით, მასზე არ ვრცელდება „პერსონალურ მონაცემთა დაცვის შესახებ“ საქართველოს კანონის 34-ე მუხლი.
2. სენაკის რაიონული (მათ შორის აბაშისა და მარტვილის მაგისტრატი) სასამართლოს საქმიანობის თავისებურებების გათვალისწინებით, მასზე არ ვრცელდება „პერსონალურ მონაცემთა დაცვის შესახებ“ საქართველოს კანონის 26-ე მუხლი.
3. სენაკის რაიონული (მათ შორის აბაშისა და მარტვილის მაგისტრატი) სასამართლოს საქმიანობის თავისებურებების გათვალისწინებით, მასზე არ ვრცელდება „პერსონალურ მონაცემთა დაცვის შესახებ“ საქართველოს კანონის 35-ე მუხლი. იმ შემთხვევაში თუ სენაკის რაიონული (მათ შორის აბაშისა და მარტვილის მაგისტრატი) სასამართლო მონაცემთა დამუშავებას განხორციელებს თანადამუშავებელთან ერთად, ამ დებულებაში ცვლილებები განხორციელდება საქართველოს კანონმდებლობით დადგენილი წესის შესაბამისად.